

ዳኣኔኤሌ ማፃኣፖ ዓይያ ካር

ጾኦሲ ማሊያ ከኤዜ ዳኣኔኤሌ ማፃኣፖ ፃኣፒንቴሢ ዓይሁዶ ዓሳ ሜሌ ዴር ካኣቶ ዴማ ዋርቃ ዋዴና ዴኤፒ ዳውሲሢና ሄርቁ ዋይሥሢ ዓይያ ሄሌም ሜታዲሢዳ ዓኣንቴኬ። ሃኖ ማፃኣፖ ፃኣፒ ዓሢ ማዲንቴ ሃይሶ ከኤዚሢና ገንሣ ሃሣ ጾኦሲ ዒዛም ፔጋሲ ዳዌ ባኮ ከኤዚሢና ዬኖ ዋዶና ዓኣ ዴር ዶዲሻኔ፤ ዓይያ ሄርቁ ዋይሣ ዓሢ ሺኢሺ ዴራ ፔኦም ካፒሲ ናንጋንዳ ናንገ ጾኦሲ ዒንጋንዳሢያ ሃጋኣ ዋዛ ማሃ ዒ ከኤዛኔ። ማፃኣፒሎኮ ላምዖ ዴኤፒ ዴኤፒ ቤሲ ዓኣያኬ።

1. ዳኣኔኤሌንታ ዒዛና ዋላ ዳውሲንቴ ዳካ ዓሲሰኬንሢንታ ጾኦሲ ዓይያ ዶዲ ጉሙርቁሢሮ፤ ሃሣ ዒዛም ዓይያ ዓይሢንቴሢሮ ዓይያኮ ሞርካ ቦርሲንቴ ሃይሴ ከኤዛይ ዓኣኔ፤ ዬይ ባካ ማዲንቴሢ ባብሎኔና ፓርሴና ካኣታ ካኣታዲ ዋይሣ ዋዶናኬ።
2. ዳኣኔኤሌም ጾኦሲ ፔጋሲ ዳዌ ዴማ ዴማ ባኮ፤ ዬይ ዳዊንቴ ባካ ባብሎኔ ካኣቱማፓ ዓርቃዖ ዴማ ዴማ ካኣታ ካኣታዲ ካኣታዲ ገንሣ ዶዓንዳሢና ሜሌ ዴርታዖ ዋይሣ ዓሳ ባይቁም ጾኦሲ ዴራ ፔኤኮ ቤርታኣ ቤዞ ገንሣ ማዓንዳሢ ዛላ ዳዎናያኬ።

ማፃኣፒላ ዴማ ዴማ ዓርቁ ባኮ

- ዳኣኔኤሌና ዒዛኮ ሃይሣ ላጎንሢ (1:1-21)
- ካኣቲ ናብካዳናጾኦሬኮ ዓውቶ (2:1-49)
- ሲዲራቁ፣ ሚሳቁንታ ዓብዲናኣጎንታ ጾኦሲ ዓኤታ ታማፓ ዓውሴሢ (3:1-30)
- ናብካዳናጾኦሬ ላጎካይ ለዒ ካኣቱማፓ ከዲ ዴዒሢ (4:1-37)
- ካኣቲ ቢልፃሶኦሬና ኮጩይዳ ፃኣፒንቴ ጴዴ ባኣዚና ዛላ (5:1-31)
- ጾኦሲ ዳኣኔኤሌ ዘባፓ ዓውሴሢ (6:1-28)
- ዳኣኔኤሌም ጾኦሲ ፔጋሲ ዳዌ ያይዶ ቦዖ ኮኣኪንሢ (7:1-28)
- ዳኣኔኤሌም ጾኦሲ ፔጋሲ ዳዌ ዓዴ ማራይና ኮላይ ኮኣኪንሢ (8:1-27)
- ዳኣኔኤሌ ዴርም ሺኢቁሢ (9:1-27)

ዳኣኔኤሌ ጃግርሴ ዋሮ ዓጫ ዴንቁ ያኦሲ ኪኢታንቻሢ (10:1—11:45)
ጋፒንዖ ዋዶ ዛላ (12:1-13)

ዳኣኔኤሌና ላጎንሢና ናብካዳናያኦሬኮ ካኣቱሞ ማኣሮይዳ

1 ዒዮዓቁሜ ዪሁዳይዳ ካኣታዳንቴ ሃይሣሳ ሌዖና ባብሎኔ ካኣቲ ናብካዳናያኦሬ ያላኒ ሙኪ ዬሩሳላሜ ማንገኔ። 2 ናንጊና ናንጋ ጎዳ ዪሁዳ ካኣቲ ዒዮዓቁሜንታ ጌኤዠ ማኣሮይዳ ማዶ ማዴንቶ ሜሆኮ ዛላንታ ካኣቲ ናብካዳናያኦሬሞ ዓኣሢ ዒንገኔ፤ ዬይ ካኣታሢ ዬያ ያኦሲሞ ዲማዴ ሜሆ ባብሎኔይዳ ዒዛኮ ካኣሽኮ ያኦዞ ማኣራ ዔኪ ዴንዲ ጌሢኔ።

3 ዬካፓ ካኣቲ ናብካዳናያኦሬ ዓሽፔናዜ ጌይንታያ ዒዛኮ ዶንዞ ሱኡጌሰኬያ ዲዒንቴ ሙኬ ዒሰራዔኤሌ ዓሶ ባኣካፓ ካኣቲ ማኣራ ዓሲ ማዔያና ሱኡጌ ማዒ ዋይሣ ዓሲናኮ ናይ ማዔ ዴጌ ናይ ዳካ ዶኦሪ ዔኪ ዬዓንዳጉዲ ዓይሢኔ፤ 4 ዶኦሪንታኒ ኮይሳ ዴጌዘንሢ ካኣቱሞ ማኣሮይዳ ማዶ ማዳኒ ዳንዳዓያ፣ ሚዛጲ፣ ዔራቶና ጳቂሥሢና ዓኣያ፣ ዔኤቢ ቢያ ዑኩና ዔራኒ ዳንዳዓያ፣ ዑሢ ቢያ ኩሙሢ ማዔያኬ ጌይንቴኔ፤ ዬንሢ ዴጌዘንሢ ዔኪ ሙካዖ ባብሎኔ ዓሶ ዳንጎንታ ፃኣፖ ጎይዖሞ ዔርዛንዳጉዲ ካኣቲ ፔ ዶንዞ ሱኡጋሢ ዓይሢኔ። 5 ጊንሣ ሃሣ ዔያታ ሙዓንዳ ሙዖና ዑሽካንዳ ዋይና ዑዠ ካኣቱሞ ጊኢጊሸናሢፓ ዔውቲ ዒንገንታንዳጉዲ ካኣቲ ዓይሢኔ፤ ዬያይዲ ዔያታ ኮይሳ ባኮ ሃይሣ ሌዔ ዴዒ ዔሪሰካፓ ካኣቲ ቤርቶ ሺኢኪ ጳዲ ካኣቱሞ ማኣሮ ማዶ ማዳንዳጉዲ ጌይንቴኔ። 6 ዬያቶ ዶኦሪንቴዘንሢ ባኣካ ዪሁዳ ፃጲ ማዔያ ዳኣኔኤሌ፣ ሃናኒያ፣ ሚሳዔኤሌንታ ዓዛሪያ ጌይንታሰኬንሢ ዓኣኔ። 7 ዬይ ካኣቲኮ ዶንዞ ሱኡጋሢ ዔያቶኮ ሱንዖ ላኣሚ፡- ዳኣኔኤሌኮ ቢልፃሶኦሬ፣ ሃናኒያኮ ሲዲራቁ፣ ሚሳዔኤሌኮ ሚሳቁ፣ ዓዛሪያኮ ዓብዲናኣጎ ጌይ ጌሢኔ።

8 ዳኣኔኤሌ ዒማና ካኣቲ ሙዖ ሙዒ ዑዠፍ ዑሽኬቴ ዒ ካኣሽካ ያኦሲ ዬያ ዓይሢባኣያታሢ ዔሪ፣ ፔና ዒኢሳዓ ጌይ ዒፃኔ፤ ዬያ ማሊዮ ዒዛኮ ዓሽፔናዜ ዔኤዓንዳጉዲ ዒዚ ሺኢቁኔ። 9 ያኦሲ ዬያ ሱኡጋሢኮ ዒና ዳኣኔኤሌ ቦንቺ ሚጩንታንዳጉዲ ኮሼኔ። 10 ጋዓንቴ ዬይ ዓሽፔናዜ ካኣቲ ዒጊጩሢሢሮ ዳኣኔኤሌ ኮይላ፡- «ሙዖና ዑዠና ዒንሣሞ ዒንጋንዳጉዲ ዓይሢሢ ፔኤር ካኣቲኬ፤

1:1 1:1 2ካኣቶ. ማ 24:1፤ 2ያኦሲ. ዓሃኬ 36:5-7። 1:4 1:4 2ካኣቶ. ማ 20:17-18፤ 24:10-16፤ 2ያኦሲ. ዓሃኬ 36:10፤ ዒሲ. 39:7-8።

ዒንሢ ማሌ ዴጌ ናኣቶፓ ባሼ ያኦፒ ዴዴቲ ካኣቲ ታና ዎዳንዳኔ ጌይ ታ ዒጊጫኔ» ጌዔኔ። 11 ዩካፓ ዳኣኔኤሌ ዒዛንታ ዒዛኮ ላጎ ሃናኒያ፣ ሚሳዔኤሌንታ ዓዛሪያንታ ካፓንዳጉዲ ዓሸፔናዜ ዓይሢ ጌሣ ዓሲሰኬያ ኮይላ ዴንዳዎ፡- 12 «ኦኡኒ ሳኣሚ ዎላሺ ሙዒ ሙዒ፣ ሃሃ ዎኣሢ ዑሽኪ ዑሽኪ ዴዓንዳጉዲ ማሃጋፓ ኦና ዴንዲ ታጶ ኬሊ ሄላንዳኣና ዛጌ፤ 13 ዩያይዴሰካፓ ካኣቲሞ ማኣራፓ ዓይሢንቲ ሙዎ ሙዓ ዴጌዘንሢና ዎላ ኦና ቤቂሣ፤ ኔ ዛጋንቲ ፓጩ ባኣዚ ኦጊዳ ዴዴቲ ኦና ኔ ዓይሎይዳ ኮይሴ ባኣዚ ማዴ» ጌዔኔ።

14 ዩይ ዔያቶ ካፓሢ ዩኖ ማሊያና ዔኤዒ ታጶ ኬሊ ሄላንዳኣና ዔያታ ጌዔ ጎይዎ ማዲ ዎይታቲያ ዛጌኔ። 15 ታጶ ኬላ ጋፓዛ ካኣቲ ማኣሮ ሙዎ ሙዓ ዴጌዘንሢፓ ባሼ ዔያቶኮ ዓኣፖ ካራ ሚዛጶ፣ ዑፃኣ ዲጩ ዴዴኔ። 16 ዩማፓ ዓርቃዎ ዩይ ካፓ ዓሢ ካኣቲሞ ማኣራፓ ዳከንታ ኮዦ ሙዎና ዎይኖ ዑዦና ሃሺ ዔያቶሞ ሳኣሚ ዎላሺና ጊኢጊሾና ሙኡዚ ሌሊ ዒንጊሢ ዓርቂኔ።

17 ያኦሲ ዩንሢ ያይዳ ዴጌዘንሢሞ ዓይጎ ዔራቶዎ ማዎም ፃኣፖ ባኣዚያ ዔራጎዳ ዔራቶና ጶቂሥሢና ዒንጌኔ፤ ዳኣኔኤሌ ጊንሃ ዩያቶ ባኣካፓ ያኦሲ ፔጋሲ ዳዎ ባኣዚንታ ዓውቲንታ ቡላ ዔራቶ ዓኣ ዓሲ ማዔኔ።

18 ካኣቲ ጌዔ ሃይሃ ሌዓ ጋፓዛ ዓሸፔናዜ ዶኦሪንቲ ዴጌዘንሢ ቢያ ዔኪ ካኣቲ ናብካዳናዎኦሬ ቤርቶ ሺኢሼኔ። 19 ካኣቲ ዩያቶ ቢያሢና ጌሰቲ ዛጋንቲ ዩያቶ ባኣካ ዳኣኔኤሌ፣ ሃናኒያ፣ ሚሳዔኤሌንታ ዓዛሪያንታጉዳ ዴጌ ፔቲታዎ ዴዲባኣሴ፤ ዩያሮ ዔያታ ካኣቲ ማኣራ ማዳንዳጉዲ ዶኦሪንቲኔ። 20 ዔኤቢ ዔሪሢና ጶቂሥሢና ካኣቲ ያኦጫ ባኮኮ ካኣቲ ዎይሃ ዓጮይዳ ዓኣ ዦዎና ማርሾ ማርሻ ዓሶፓ ቢያ ታጶ ጳንጩ ማዓያ ዔራ ማዒ ዔያታ ዴዴኔ። 21 ዳኣኔኤሌ ዩያይዲ ዴንዲ ካኣቲ ቂኢሮሴ ካኣታዴ ቤርታሳ ሌዎ ሄላንዳኣና ካኣቲሞ ማኣራ ማዳያ ማዒ ዴዔኔ።

2

ናብካዳናዎኦሬ ዓውታዴ ዓውቶ

1 ካኣቲ ናብካዳናዎኦሬ ካኣታዴዎ ላምዓሳ ሌዎና ዓውቲ ዓውታዴኔ፤ ዒዚ ዩያ ዓውቶና ሜታዲ ጊንዎ ባይዜኔ። 2 ዩያሮ ዒዛም ሙኪ ዩያ ዓውቶ ቡሊ ኬኤዛንዳጉዲ ዦዩንታ ማርሻ ማርሻ ዓሲንታ ዓማቶንታ ካላዳ ዓጮይዳ ዦኦጋሢ ፓይዲ ፓይዲ ዔሶ ዔራ ዓሶዎ ዒ ዔኤሊሴኔ፤ ዩይ ዓሳ ዒማና ሙኪ ቤርታ ዒዛኮ

ዔቄኔ፤ 3 ካኣቲ ዔያቶ ኮራ፡- «ታኣኒ ዓውቲ ዓውታደፅ ዩና ዓውታ ዓይጎታቲያ ታ ዔራኒ ሚርጌና ማሊ ማታደኔ» ጌዔኔ።

4 ዔያታ ማሃፅ ዓራማይኬ ሙኡቸና፡- «ካኣቲዮ፡ ናንጊና ካኣታዲ ናንጌ! ኔ ዓውታደ ዓውታ ዓይጎታቲያ ኑም ኬኤዜ፡ ኑ ኔኤም ቡሊፅ ኬኤዛንዳኔ» ጌዔኔ።

5 ካኣቲ ዔያቶም፡- «ቤርታሳፅ ታ ዓውታደ ዓውቶ ኬኤዙዋቲ፡ ሄሊሳፅ ዋዚ ጋዓ ቡሊሢ ዓኣቲያኣ ኬኤዙዋቲ፤ ዒንሢ ኬኤዚባኣቲ ዒንሢ ጨርኪንቲም ማኣራኣ ዒንሢኮ ፒፆና ቡኡራ ላኣሎ ቤሲ ማዓንዳጉዲ ታ ጌዔኔ። 6 ታ ዓውታደ ዓውቶና ቡሊፅና ታኣም ዒንሢ ኬኤዜቲ ታ ዒንሢም ዒንጎ ባኣዚና ዴኤፒ ቦንቸንቲና ዒንጎንዳኔ፤ ዩያሮ ታ ዓውታደ ዓውቶንታ ዋዚ ጋዓ ቡሊሢ ዓኣቲያ ዋላ ኬኤዙዋቲ» ጌዔኔ።

7 ዔያታ ገንሣ፡- «ካኣቲዮ! ኔ ዓውታደ ዓውቶ ኑና ኔ ዓይሎም ኬኤዜቲራ፡ ኑ ኔኤም ዋዚ ጋዓ ቡሊሢ ዓኣቲያ ኬኤዙም» ጌዔኔ።

8 ካኣቲ ዩያ ዔያታ ጋዓዛ ዋይዛፅ፡- «ታኣኒ ያዲ ማፅንጎ ጌዔ ባካ ደዲ ማዔሢ ዒንሢ ዔሪ ዋደ ጎቻኒ ጌሰታሢ ታ ዔሬኔ፤ 9 ዒንሢ ታ ዓውታደ ዓውቶ ኬኤዛኒ ዳንዳዒባኣቶ ዒንሢ ቢያሢዳ ፔቲ ሄላንዳ ማታ ዓኣኔ፤ ታ ዩያ ጌዔ ባኮ ታኣኒ ገንሣ ሺርሻንዳያ ዒንሢም ማሌም ሉኡዚ ባኣዚ፡ ሃሣ ጌኔ ባኣዚ ኬኤዚ ኬኤዚ ጉሪ ዋደ ዒንሢ ጎቻኒ ማሌኔ፤ ዩያሮ ዒንሢ ዓውቶ ታኣኮ ኬኤዜቲ ቡሊፅ ዒንሢ ባሺንዳዋኣሢ ታ ዔራኔ» ጌዔኔ።

10 ዒማና ካላዳ ዓጮይዳ ዠኦጋሢ ፓይዲ ፓይዲ ዔቦ ዔራ ዓሳ፡- «ካኣቲዮ! ኔኤኒ ዔራኒ ኮዓ ባኮ ኔኤም ኬኤዛኒ ዳንዳዒ ዓሲ ዓይጎ ዓጨዳኣ ጴዳባኬ፤ ፔቲ ካኣቲ ዋዚዒ ዴኤፒ፡ ሃሣ ዋልቃደያ ማዓቲያ ዩያጉዴ ፆኦጨሢ ዠዋንታ ማርሻ ማርሻ ዓሶንታ ዠኦጋሢ ፓይዳ ዓሶ ኮራኣ ፆኦጨ ቤቁባኣሴ። 11 ካኣቲዮ! ኔ ዩያ ፆኦጨ ዴኤፅ ፆኦጨ ፆኦጨ ጌዒ ካኣሽኮ ባኮፓ ዓቲም ማሌ ማሂ ኬኤዛንዳ ዓሲ ባኣሴ፤ ዩይ ፆኦጨ ጌይ ካኣሽኮ ባካ ሃይካ ዓሲባኣካ ናንጋያቲዋሴ» ጌዔኔ።

12 ዩያሮ ካኣቲ ሚርጌና ደጋዲ ባብሎኔ ዓጮይዳ ዓኣ ዔሮ ዓሳ ጉቤ ዋዲንታንዳጉዲ ዓይሢ። 13 ዔሮ ዓሶ ዋዲኒ ማሊንቲ ማሊፅና ዔቃፅ ዳኣኔኤሌንታ ዒዛኮ ላጎዋ ዋላ ዋዲኒ ዔያታ ማሌኔ።

ዓውቶኮ ቡሊፅ ፆኦጨ ዳኣኔኤሌም ፔጋሴሢ

14 ዩያ ዓይሢፅ ማዲ ኩንሣንዳጉዲ ዓይሢንቲሢ ካኣቲ ካፓ ፖኦሊሶ ዓይሢሢ፡ ዓሪዮኬ ጎፆሢኬ፤ ዳኣኔኤሌ ዒማና ዩያ ዓሢ ኮይላ ዴንዳፅ ዔራቶና፡- 15 «ካኣቲ ዩያ ዴኤፅ ዓይሢፅ ዋይታዛ

2:2 2:2 ማዢ. ማፃ 41:8።

ከሴይ?» ጌራ ያኑጩኔ፤ ዩያር ዓሪዮኬ ዳኣኔኤሌም ጎይያ ኮሺ ከኤዘኔ።

16 ዩካፓ ዳኣኔኤሌ ኔጉዋዎ ካኣቲ ኮይላ ጌሊ ዓውቶ ቡሊዮኮ ደካ ዋዴ ዒንጋንዳጉዲ ሺኢቄኔ። 17 ዩያዴሰካፓ ዳኣኔኤሌ ፔ ማኣሪ ዴንዳዎ ጌይንቲ ባኮ ዒዛኮ ላጎ ማዔ ሃናኒያ፣ ሚሳዔኤሌንታ ዓዛሪያንታም ከኤዘኔ። 18 ጊንሣ ሃንጎ ባብሎኔይዳ ዓኣ ዔር ዓሶና ዋላ ዋዲንቲዋጉዲ ጫሪንጮ ያኦዛሢ ዔያቶ ሚጪንቲ ማኣዳንዳጉዲና ዩኖ ዓውቶኮ ቡሊዮዋ ፔጋሲ ከኤዛንዳጉዲ ሺኢቆም ፔ ላጎንሢ ዒ ዓይሣኔ። 19 ዩኖ ዋንቲሎ ዓኣሺንቲ ባኮ ዳኣኔኤሌም ያኦሲ ፔጋሲ ዳዌኔ፤ ዩያር ዒዚ ጫሪንጮ ያኦዛሢ ሢዚ ጌራ ጋላቲኔ፡-

20 «ዔራቶንታ ዋልቄንታ ዒዛር ማዔሢር ያኦሲ ናንጊና ጋላቲንቶንጎ!

21 ዒዚ ዋዴና ሌዎና ላኣሚ ላኣሚ ዔኪ ዩይሳኔ፤ ካኣቶ ካኣቲዋ ያይታ ዴይሣኔ፤ ያይታፓኣ ከሣኔ፤ ዔራቶ ዔር ዓሶም፣ ጪንጩዋዋ ማሊ ጰቂሣ ዓሶም ዒንጋሢ ዒዛከ።

22 ዒዚ ዔርታኒ ዳንዳዑዋ ባኮንታ ዓኣሺንቲ ባኮዋ ፔጋሳኔ፤ ዒዛ ኮይላ ቢያ ዋዴ ፖራ ዓኣሢር፣ ዲሚዳ ዓኣሺንቲ ባኮ ዒ ዔራኔ።

23 ታኣኮ ቤርታኣ ዓድንሢኮ ያኦዛሢዮ! ታ ኔና ጋላታኔ፤ ታ ኔና ዴኤፒሳኔ፤

ኔኤኒ ዔራቶንታ ዋልቄንታ ታኣም ዒንጌኔ፤ ኦኡኮ ኔ ሺኢጲያ ዋይዚ ካኣቲኮ ዓውቶ ኔ ኦም ፔጋሴ።»

ዳኣኔኤሌ ካኣቲኮ ዓውቶ ቡሊዮና ዋላ ከኤዘሢሢ

24 ዩካፓ ዳኣኔኤሌ ባብሎኔይዳ ዓኣ ዔር ዓሶ ዋዲንዳጉዲ ካኣቲ ዓይሣ፣ ዓሪዮኬ ኮይላ ዴንዳዎ፡- «ባብሎኔይዳ ዓኣ ዔር ዓሶ ዋዲፖ፤ ሃሢ ታና ካኣቲ ኮይላ ዔኪ ዓኣዴ፣ ዓውቶኮ ቡሊዮ ታ ዒዛም ከኤዛንዳኔ» ጌዔኔ።

25 ዩማና ዓሪዮኬ ዳኣኔኤሌ ኔጉዋዎ ካኣቲ ናብካዳናዎኦሪ ቤርቶ ዔኪ ሺኢሻዎ፡- «ካኣቲዮ! ኔኤኮ ዓውቶኮ ቡሊዮ ኔኤም ከኤዛንዳያ ዲዒ ዔኪ ዩዎና ዩሁዳ ዓሶ ባኣካፓ ፔቲ ዓሲ ታ ዴንቄኔ» ጌይ ካኣቲም ከኤዘኔ።

26 ዩያር ቢልፖሶኦሪ ጌይንታ ዳኣኔኤሌ ኮይላ ካኣቲ፡- «ታኣኒ ዓውታዴ ዓውቶንታ ቡሊዮንታ ታኣም ኔ ከኤዛኒ ዳንዳዓ?» ጌይ ያኦጩኔ።

27 ዳኣኔኤሌ ማሃዎ፡- «ካኣቲዮ! ኔኤኒ ያኑጩ፣ ዩያ ዓኣሺንቲ ባኮ ዔር ዓሶዋ ማዎም ማርሻ ማርሻ ዓሳ፣ ዦዋታቲያ ዓማታ ኔኤም

ከኤዛኒ ዳንዳዑዋሴ። 28 ጋዓንቴ ዓኣሺንቴ ባኣዚ ቢያ ፔጋሲ ዳዋ ፔቴ ያኣሲ ጫሪንጫ ዓኣኔ፤ ሃጊ ሴካ ማዓንዳ ባኮ ቢያ ዒዚ ኔኤም ፔጋሲ ዳዋ፤ ኔኤኒ ላሂ ሻኣሎይዳ ዓኣዖ ዓውታጄ ዓውቶና ኔ ዒኖይዳ ኔኤም ያኣሲ ፔጋሲ ዳዋ ባካ ያዲኩ።

29 «ካኣተዮ! ኔኤኒ ኔኤኮ ሻኣሎይዳ ላሂ ዓኣዖ ሃጊ ሴካ ቤርታ ማዓንዳ ባኣዚ ማሌኔ፤ ዩያሮ ዓኣሺንቴ ባኣዚ ፔጋሲ ዳዋ ያኣዛሂ ሃጊ ማዓንዳ ባኮ ኔኤም ዔርዘኔ። 30 ዩይ ዓኣሺንቴ ባካ ታኣም ፔጋዲ ጰዴሂ ሜሌ ዓሶፓ ባሼ ታ ዔራ ማዔሂሮቱዋሴ፤ ጋዓንቴ ኔኤኒ ዩያ ዓውቶኮ ቡሊያ ዔራንዳጉዲና ኔ ዒኖ ጋራ ኔ ሺርሺ ሺርሺ ማሌ ባኮ ጰቂሂ ኔ ዒና ዔካንዳጉዲኩ።

31 «ካኣተዮ! ዑሣ ዓኣጄ ዓኣፒዳ ዲካያ፤ ዩያይዳፓ ዔቁያና ዛጋኒያ ዒጊቻ ፔቴ ዓሲ ማላ ዴኤፒ ባኣዚ ኔ ቤርታ ዔቁ ዓኣንቴ ኔ ዛጌኔ። 32 ዩያ ባካሂኮ ቶኣካ ጌኤሺ ዋርቁና፣ ዳዶና ኩጮና ቢራ ዓንጊና፣ ጎጶና ጉባዘና ሞኦና ዓንጊና፣ 33 ዘኣላ ዓንጊና፣ ቶኮ ዜዶኮ ዛላ ዓንጊና፤ ዛላ ጊንሣ ዠኢጤ ዓጪና ኮሾናያኩ። 34 ኔኤኒ ዩያ ባካሂ ዛጋንቴ ዴኤፒ ሹቺ ዓሲ ኮላሱዋንቴ ቡጊንታዖ ኮላዲ ኩዴኔ፤ ዩይ ኩዴ ሹጫሂ ዓንጎና ዠኢጤ ዓጮና ኮሾና ቶኮ ዜዶ ሜንሂኔ። 35 ዩይ ሹጫ፣ ዠኢጤ ዓጮና ማኮናሂ፣ ሞኦና ዓንጋ፣ ቢሮ ዓንጎንታ ዋርቆንታ ኔጉዋዖ ሜቁ ጋኣጪንቴ ያጎሂና ቆይዳይዳ ሺርኪ ሃሾና ዲልባ ማዔኔ፤ ዩያ ዲልቦ ፔቴታዖ ዓይሱዋዖ ዠባሬ ፒዳ ዔኪ ዴንዴኔ፤ ጋዓንቴ ዩያ ባካሂዳ ኩዴ ሹጫሂ ዓጮ ቢያ ኩሚ ዴግ ዴግ ጋዓዖ ዴኤፒ ዲካ ማይ ዴዔኔ።

36 «ዋይዜ፣ ዓውታ ዩያኩ፤ ቡሊያ ሃካፓ ዴማ ከኤዚንታ ጎይዖጉዴያኩ። 37 ካኣተዮ! ኔኤኒ ቢያፓ ባሼ ካኣቶኮ ካኣተኩ፤ ጫሪንጫ ያኣዛሂ ካኣተሞ፣ ዋልቁ፣ ቢታንቶንታ ቦንቶንታ ኔኤም ዒንጌኔ። 38 ዓጮ ቢያ ኔና ዋይሂያ ማሂኔ፤ ዓሲንታ ቦዖንታ ካፒንታይዳ ቢታንቶ ኔኤም ዒዚ ዒንጌኔ፤ ዩያሮ ዋርቆ ማዔ ቶኣካሂ ኔናኩ። 39 ኔኤኮ ጊንፃፓ ዴኤፑሞና ኔጊዳፓ ሃታ ካኣታ ኬሰካንዳኔ፤ ዩያፓ ሄሊሶዖ ዓጮ ቢያ ዋይሂንዳያ፣ ሞኦና ዓንጎና ማሊሶናሂ፣ ሃይሣሶ ቤዘ ዓርቁ ኬሰካንዳኔ። 40 ሃሣ ጊንሣ ዩያ ቢያሂ ሜንሂ ጋኣጫያ፣ ዓንጊጉዲ ደዳያ፣ ዖይዳሳ ካኣታ ኬሰካንዳኔ፤ ዓንጊ ቢያ ባኣዚ ሜንሂ ጋኣጫሂጉዲ ዒዚ ዒዛኮ ቤርታ ዓኣ ካኣቶ ቢያ ሜንሂ ጋኣጫንዳኔ። 41 ዔባሂኮ ቶኮ ዜዶና ከኤሎናኮ ማዠንታ ዛላ ዓንጊ፣ ዛላ ዠኢጤ ዓጪናታሂ ኔ ዛጌኔ፤ ዩይ ዳዋሂ ዩይ ካኣታ ፓቂንቴ ካኣቶታሂኩ፤ ዓንጎንታ ዠኢጤ ዓጮና ኮሾና ባኮንታ ሲኢሪንቴንቴ ኔ ዛጌ ጎይዖ ዩይ ካኣታ ዋይሂ ዓጮኮ ዛላ ሹቺጉዲ ደዳንዳኔ። 42 ዩያ ባካሂኮ ቶኮ ከኤሎ ማዠንታ ዛላ ዓንጊ፣ ዛላ

ዠኢጤ ሳጤና ኮሾና ባኣዚ ማዕሚፕዲ ዬይ ካኣታሢ ዎይሢ ሳጤኮ ዛላ ደዲ፥ ዛላ ላቤያ ማዕንዳኔ። 43 ዓንጎንታ ዠኢጤ ሳጤና ኮሾና ባኮንታ ዎላ ሲኢሪንቴንቴ ኔ ዛጌ ጎይዎ ዬንሢ ላምዎ ካኣቶንሢኮ ዴራ ዎላ ዔፒና ሲኢሪንታንዳኔ፤ ጋዓንቴ ዓንገና ዠኢጤ ሳጤና ዎላ ሲኢሪንታን ዳንዳዑዎኣሢፕዲ ዬይታ ፔቴ ማዕኒ ዳንዳዑዎሴ፤ 44 ዬንሢ ካኣቶንሢ ዎይና ፔቴታዎ ደዓኒ ዳንዳዑዎያ፤ ገንሢ ሃሢ ማሌ ዴሬ ጤርቂ ጌሊ ያላኒ ዳንዳዑዎ ካኣቶ ጤሪንጮ ያኣዛሢ ዔቀሳንዳኔ፤ ዬይ ካኣቲ ማሌ ካኣቶ ዴንዲ ጋፒንሢ ሄላንዳኣና ባይዛንዳኔ፤ ዒዚ ጋዓንቴ ናንገና ደዲ ናንጋንዳኔ፤ 45 ዓሲ ኩቺ ካኣሙዎንቴ ዲኮይዳፓ ቡገንቴ ኬዲ ናንጎና፥ ሞኦና ዓንጎና፥ ዠኢጤ ሳጤና፥ ቢሮ ዓንጎና፥ ዎርቆናኣ ማኰና ባኮ ማንሢ ጋኣጤ ሹጤሢ ዬይ ካኣታሢኮ፤ ዬይይዲ ዴኤፖ ያኣዛሢ ሃጊ ማዕንዳ ባኮ ቢያ ኔኤም ዳዌ፤ ዎይዜ፥ ዓውታ ጎኔ ዓውቴኮ፤ ፒዜ ማዕ ቡሊፃኣ ያዲኮ።»

ካኣቲ ዳኣኔኤሌም ዒንጌ ባኮ

46 ዬካፓ ካኣቲ ናብካዳናዎኦሬ ባሊቶ ሳዎ ሄሊሲ ዳኣኔኤሌም ዘገኔ፤ ዓሳ ዒዛም ሃኣኮ ዒንገሢንታ ዑንጂያ ጤቢሻንዳፕዲ ዓሶ ዓይሄኔ። 47 ካኣቲ ዒማና ዳኣኔኤሌም፡- «ኔኤኮ ያኣዛሢ ካኣሽኪንታ ያኣዘይዳፓ ቢያ ባሼኮ፤ ካኣቶኮ ቢያ ጎዳኮ፤ ዓኣሽንቴ ባኣዚ ቢያ ፔጋሲ ዔርዛኒ ዳንዳዓያኮ፤ ዬያሮ ኔኤኒ ሃያ ዴኤፖ ዓኣሽንቴ ባኮ ፔጋሲ ዔራኒ ዳንዳዔኔ» ጌዔኔ። 48 ዬካፓ ካኣቲ ዳኣኔኤሌ ዴኤፒ ቦንቺንታ ቤሰካ ዔኪ ጌሄኔ፤ ሚርጌ ባኣዚያ ዒዛም ዒንጌ፤ ባብሎኔ ዓጮይዳ ቢያሢ ዎይሢያ ዒዛ ማሄኔ፤ ባብሎኔይዳ ዓኣ ዔሮ ዓሶኮዎ ቢያ ዒዛ ሱኡጌ ማሄኔ። 49 ዳኣኔኤሌ ካኣቲም ኬኤዜም ሲዲራቁንታ ሚሳቁንታ ዓብዲናኣጎንታ ባብሎኔኮ ዳማ ዲማ ፓቆና ዓጮ ቢያሢዳ ዎይሢ ዓሲ ማሂ ካኣቲ ዔያቶ ደኦሬ፤ ዳኣኔኤሌ ጋዓንቴ ካኣቲም ማኣራ ዴዔኔ።

3

ናብካዳናዎኦሬ ዎርቆ ዓንጎና ኮሺሴ ባኮ

1 ካኣቲ ናብካዳናዎኦሬ ሌካ ዔጳ ላሂታሚ ዎዳ፥ ዳልፕማ ላሆ ዎዳ ማዕ ዓሲ ማላ ባኣዚ ዎርቆና ማዠሲ ባብሎኔ ዓጮይዳ ዓኣ ዴራ ጌይንታ ቦኦሎይዳ ደቂሴኔ። 2 ዬያ ባካሢ ዓንጂ ማደይዳ ፔኤሻኒ ጌይ ቦንቺንታ ቦንቺይዳ ሙካንዳፕዲ ዓጮ ዎይሢ ዓሶ፥ ዴኤፖ ዴኤፖ ሱኡጎ፥ ዒዛኮ ደንዞ፥ ዒዛኮ ዓኣ ቆሎ ዎይሢ ሱኡጎ፥ ዎጎ ዎጋ ዓሶንታ፤ ዬያፕዲ ፔቴ ፔቴ ዓጮይዳ ቢታንታ ዓኣ ዓሶዎ

ዒዚ ዔኤሌኔ።³ ዬይ ቢታንታ ዓላ ዓሳ ቢያ ዬኖ ቦንቾ ኬሎ ፔቱሞና ሙኪ ቡካዖ ዬያ ማዢ ደቆና ባካሢኮ ቤርታ ዔቁኔ፤⁴ ዒማና ፔቱ ዒላቲ ዔኤሌሌ ኬኤዛ ዓሲሰኬይ ፔኤኮ ዑኡዞ ደጊዲ፡- «ዒንሢ ዲማ ዲማ ዓጫፓ ሙኬ ዳሮንታ ዲማ ዲማ ሙኡጮ ጌሰታ ፃጰ!⁵ ዒንሢ ዛዬ፣ ዲንካ፣ ፔቱ ሻሺ ዴንሦ ጎኦላ፣ ዲቢ ሻሺና ዴንሦ ጎኦላንታ ሹሉንጎንታ፤ ዬያጉዲ ዓይኑሞ ዓይናደ ባኣዚኮ ቢያ ዑኡሲ ዋይዜ ዋደና ሳዓ ሎኦሚ ላሂ ካኣቲ ናብካዳናዖኦሬ ዋርቆና ኮሺ ደቂ ዔቁሴ ዓሶ ማላ ባካሢሞ ዚጋንዳጉዲ ካኣቲ ዓይሣ፤⁶ ሳዖይዳ ሎኦሚ ላሂ ዚገባኣ ዓሲ ዓኣቶ ዴኤፖ ዔኤታ ታሞይዳ ቤዞማና ዓጊንታንዳኔ!» ጌዔኔ።⁷ ዬያሮ ዴራ ዬያ ዋርቁንታ ባኮኮ ዑኡዞ ቢያ ዋዋይዛዖ ሳዖይዳ ሎኦሚ ላሂ ካኣቲ ናብካዳናዖኦሬ ዋርቆና ኮሺ ደቂ ዔቁሴ ዓሶ ማላ ባካሢሞ ዚጌኔ።

ዳኣኔሌሌኮ ላጎንሢ ዋጌና ዓይሢሶናሢ

⁸ ዒማና ባብሎኔ ዓጮይዳ ዡኣጎ ዛጊ ዔቦ ዔራ ዔሮ ዓሶፓ ዛላ ዓሲ ዓይሁደ ዓሳ ዋጌና ዓርቁንታንዳጉዲ ካኣቲሞ ኬኤዜኔ።⁹ ዔያታ ካኣቲ ናብካዳናዖኦሬ ኮይላ ሙካዖ፡- «ካኣቲዮ! ናንጊና ናንጌ! ¹⁰ ካኣቲዮ! ኔኤኒ ዛዬ፣ ዲንካ፣ ፔቱ ሻሺ ዴንሦ ጎኦላ፣ ዲቢ ሻሺ ዴንሦ ጎኦላ፣ ሹሉንጎንታ ዲማ ዲማ ዓይኑሞሮ ዋርቆ ባኮኮ ዑኡዞ ዋይዜ ዓይጎ ዓሲያኣ ሳዖይዳ ሎኦሚ ላሂ ዋርቆና ኮሺንቱ ዓሶ ማላ ባካሢሞ ዚጋንዳጉዲ ዓይሢባይ፤ ¹¹ ሃሣ ኔኤኒ ሳዖይዳ ሎኦሚ ላሂ ዚገባኣ ዓይጎ ዓሲያኣ ማዖም ዔኤታ ታሞ ዴኤፖይዳ ዓጊንታንዳጉዲ ዓይሢባይ፤ ¹² ሃይሻ ሃሣ ባብሎኔ ጋራ ዓኣ ዓጮ ዋይሣንዳጉዲ ኔኤኒ ዶኦሪ ጌሣ ሲዲራቁንታ ሚሳቁንታ ዓብዲናኣጎ ጌይንታ ዓይሁደንሢ ኔኤኮ ዓይሢዖ ኩንሡዋሴ፤ ኔኤኮ ዖኦዞዋ ካኣሽኩዋሴ፤ ኔ ኮሺ ዔቁሴ ዓሶ ማላ ባካሢማኣ ዚጉዋሴ» ጌዔኔ።

¹³ ካኣቲ ዬያ ዋይዛዖ ሚርጌና ደጋዲ ሲዲራቁ፣ ሚሳቁንታ ዓብዲናኣጎንታ ዔኤሊንታንዳጉዲ ዓይሣኔ፤ ዬያሮ ዔያታ ካኣቲ ቤርቶ ሺኢኬኔ።¹⁴ ናብካዳናዖኦሬ ዔያቶ ኮይላ፡- «ዒንሢ ሲዲራቁ፣ ሚሳቁንታ ዓብዲናኣጎንታ! ታኣኮ ዖኦዞ ዒንሢ ካኣሽኪባኣሢና ታኣኒ ዋርቆና ኮሺሲ ዔቁሴ ዓሶ ማላ ባካሢማኣ ዒንሢ ዚገባኣሢ ጎኔዳ? ¹⁵ ዛያሢ፣ ዲንካሢ፣ ፔቱ ሻኩ ጎኦላ፣ ዲቦ ሻኩ ጎኦላ፣ ሹሉንጎንታ ዓይኑሞሮ ዋርቆ ባኮ ቢያሢኮ ዑኡዞ ዒንሢ ዋይዛዖ ታኣኒ ኮሺ ዔቁሴ ዓሶ ማላ ባካሢሞ ሳዓ ሎኦሚ ላሂ ዚጌያ ማዔቲ ቃራ፤ ዚገባኣያ ማዔቲ ጋዓንቱ ዔኤታ ታሞ ዴኤፖ ዔቶይዳ ቤዞና ሃሣ ዒንሢ ኬኤሪንታንዳኔ፤ ታ ኩጫፓ ዒንሢ ዓውሳንዳ ዖኦሲ ባኣሢ ዔሩዋቲ» ጌዔኔ።

16 ሲዲራቄ፣ ሚሳቄንታ ዓብዲናአጎንታ ካአቲሞ ማሃዖ፡- «ካአቲዮ! ዬና ዛሎኮ ኑኡኒ ኑና ዓውሳኒ ሞኦታንዳ ሃይሴ ኬኤዛኒ ኮይሱዋሴ። 17 ኑኡኒ ዒዛሞ ማዲ ዒዛ ካአሸካ፣ ጾዛዛሂ ሃያ ዔኤታ ታሞይዳፓኦ ማፃሞ ኔ ኩጫፓ ኑና ዓውሳኒ ዳንዳዓኔ፤ 18 ካአቲዮ! ዒዚ ኑና ዓውሳኒ ኮዒባኣቲያ ኔኤኮ ጾኦዘሞ ኑ ማዲንዲዋኣሂና ኔኤኒ ዋርቆና ኮሺ ዔቂሴ ዓሶ ማላ ባካሂሞ ኑ ዘኒ ካአሸከንዲዋኣሂያ ዔሬ» ጌዔኔ።

ዳኣኤሌኮ ላጎንሂ ጾኦሲ ጉሙርቂ ታማፓ ኬሰኬሂ

19 ዒማና ናብካዳናጾኦሬ ሲዲራቄንታ ሚሳቄንታ ዓብዲናአጎንታይዳ ሚርጌና ዳጋዲ ፔኤኮ ዓኣፖ ካር ላኣሜኔ፤ ዬያር ዬያ ታሞ ዋንዴ ዔኤታሰካፓ ላንካይ ጳንጨ። ማዓንዳያ ባሽ ማሂ ዔኤህንዳጉዲ ዓሶ ዒ ዓይሂኔ። 20 ዬካፓ ዬንሂ ሃይሃንሂ ቱኪ ዔኪ ዬያ ዔኤታ ታሞይዳ ዓጋንዳጉዲ ዒዛኮ ጾሎ ዓሶ ባኣካፓ ደዲ ደዲ ማዓ ዓሶ ዓይሂኔ። 21 ዬያር ዬና ዓሳ ዔያታ ማኣዔ ጾደዘ ማኣዓሂ፣ ቆንፃሂንታ ቶኦካ ዔያታ ማሪ ዓኣ ባኮንታ ማኣዔ ማኣሂ ቢያሂና ዋላ ቱኪ ዔኪ ዔኤታ ታሞ ዔቶይዳ ዓጌኔ። 22 ካአቲ ዓይሂ ደደ ዓይሂጾጉዴያና ታማ ዋለቄና ዔኤታሂር ሲዲራቄ፣ ሚሳቄንታ ዓብዲናአጎንታ ዔኪ ታማ ኬኤሬ ዓሶ ታሞኮ ሽኤላ ሚቹ ዋዴኔ። 23 ዬያታ ሃይሃንሂ ጋዓንቴ ደዲሺ ቱኮና ጎይሂና ዓኣጾ ታሞ ዔኤታሂዳ ሎኦሜኔ።

24 ዒማና ኔጉዋዖ ካአቲ ናብካዳናጾኦሬ ዴዔ ቤዛፓ ኮኣሚ ዔቃዖ፡- «ኑኡኒ ቱኪ ዔኪ ዔኤታ ታሞይዳ ዓጌ ዓሶንሂ ሃይሃ ሌለቱዋዓዳ?» ጌይ ፔ ደንዞ ኮይላ ጾኦጩኔ። ዔያታ፡- «ካአቲዮ፣ ጎኔኬ!» ጌዔኔ።

25 ካአቲ ገንሂ፡- «ሃይሽ ሃኣዛጉዋቲ፣ ታኣኒ ታማ ፔቲታዖ ዔኤቢ ዋኦቲባኣያ፣ ቱኤዛፓኣ ቡለንቲ፣ ዔኤታ ታሞ ባኣካ ሃንታ ጾይዶ ዓሲ ዴንቃኔ፤ ጾይዳሳ ዓሂ ጾኦዘ ናይ ማላያኬ» ጌዔኔ።

ሃይሃንሂ ታማፓ ኬሰኪ ሱኡጋቶ ደኦሪንቴሂ

26 ዬካፓ ናብካዳናጾኦሬ ዔኤታ ታሞ ዔቶ ባይሂ ዑካዖ፡- «ዒንሂ ዴኤፖ ጾኦዛሂሞ ማዳ፣ ሲድራቄንታ ሚሳቄንታ ዓብዲናአጎንታ ዋይዙዋቲ! ኬሰኪ ሃኒ ዬዑዋቲ!» ጌይ ዔኤላዛ፣ ዔያታ ታማፓ ኬሰኪኔ። 27 ዒማና ዓጮ ዋይሂ ዓሶንታ ቢታንታ ዓኣ ዴኤፖ ዴኤፖ ዓሶንታ ካአቲ ዘራ ደንዘንታ ቢያ ዔያቶ ኮይላ ሙኪ ቡካፖ ታማ ዔያቶ ፔቲታዖ ዔኤቢ ዋኦቲባኣሂ፣ ቶኦኮ ጋሞኮዋ ፔቲታዖ ሚቹንቲባኣሂ፣ ዔያታ ማኣዔ ጾደዘ ማኣዓሂኮ ማላቶ ታማ ላኣሚሲባኣሂና ሚሌ ዓታዛ ጨቢ ጨቢ ጌይ ዔያቶኮ ዑፃ ዛዒባኣሂ ዛጌኔ።

28 ዩካፓ ካኣቲ ናብካዳናፆኦሬ:- «ሲዲራቁንታ ሚሳቁንታ ዓብዲናኣጎንታ ፆኦዛሢ ጋላቲንቶም! ዒዚ ፔኤኮ ኪኢታንቻሢ ዳኪ ሃንሢ ዒዛም ማዳዞንሢ ዓውሴኔ፤ ዔያታ ፔፆኦዛሢ ጉሙርቂ <ዒዛምቱዋንቲ ሜሌ ፆኦዛም ኑዚጋዓኩ» ጌይሢና ካኣቲኮ ዓይሢፆ ካፖ ሃሺ ፔኤኮ ናንጎ ፑርታ ባኣዚዳ ዓጌኔ።

29 «ጋዓንቲ ዩያይዲ ዓውሳንዳ ሜሌ ፆኦሲ ባኣሴ፤ ዩያር ዓጮ ቢያይዳ ናንጋያ፥ ዲማ ዲማ ሙኡቹ ጌሰታ ዳር ቢያሢ ባኣካ ሲዲራቁንታ ሚሳቁንታ ዓብዲናኣጎንታ ፆኦዛሢ ጫሽካ ዓሲ ዴዴቲ ዒ ቲቁንቲ ኬኤሪንቲም ማኣራ ዒዛኮ ፒዒ ኬኤር ቡኡራ ላኣሎ ቤሲ ማዓንዳጉዲ ታ ዓይሢኔ» ጌዔኔ።

30 ካኣቲ ዩያ ዓይሢፆ ዳኬሰካፓ ሲዲራቁንታ ሚሳቁንታ ዓብዲናኣጎንታ ባብሎኔ ዓጮይዳ ዴግ ዴጊዲ ዶኦሪ ሱኡጌ ማሢ ጌሢኔ።

4

ናብካዳናፆኦሬ ላምዓሲ ዛጌ ዓውቶ

1 ዓጮይዳ ቢያ ናንጋ ዳርና ዲማ ዲማ ሙኡጮ ጌሰታ ፃፂም ካኣቲ ናብካዳናፆኦሬ ሂዚ ጋዓ ኪኢታ ዳኬኔ:-

«ዒንሢ ቢያሢ ዋዚ ዓኣይ! 2 ዴኤፖ ፆኦዛሢ ታኣም ማዴ ዲቃሢ ሄርሺሳ ባኮና ዓኮ ባኮ ታ ዒንሢም ኬኤዛጌ ኮዓኔ።»

3 «ፆኦሲ ዳዋ ዓኮ ባካ ኮሺ ዴኤፒኬ!

ዒዚ ማዳ ዲቃሢ ሄርሺሳ ባካኣ ሚርጌና ዶዲኬ!

ፆኦሲ ናንጌና ካኣታዲ ናንጋያኬ፤

ዒዛ ካኣቱምኮ ጋፒንሢ ባኣያኬ።»

4 «ታኣኒ፥ ናብካዳናፆኦሬ ታኣኮ ካኣቱም ማኣርይዳ ፆርጎቹምና ኮሺንታና ታኣም ዲቤም ታ ናንጌቤቃ፥ 5 ፔቲ ኬሊ ታኣኮ ዓርሶይዳ ታ ላሂ ዓኣፆ ዒጊቻ ዓውቲና ፆኦሲ ፔጋሲ ዳዩያ ዲቃሢ ባኣዚ ዛጌኔ። 6 ዩያር ታኣኮ ዓውቶኮ ቡሊፆ ታኣም ኬኤዛንዳጉዲ ባብሎኔ ዓጮይዳ ዓኣ ዔር ዓሶ ቢያ ታ ባንሢ ታ ዔኤሌኔ። 7 ዒማና ዠዋ፥ ማርሾ ማርሻ ዓሳ፥ ዠኦጋሢ ዛጌ ዔቦ ዔራ ዓሶንታ ዓማቶንታ ቢያ ታ ኮይላ ሙካዛ ታኣኒ ታኣኮ ዓውቶ ዔያቶም ኬኤዜኔ፤ ዔያታ ጋዓንቲ ታኣኮ ዓውቶ ቡሊ ኬኤዛጌ ዳንዳዒባኣሴ። 8 ዩካፓ ታኣኮ ፆኦዛ ሱንፆና ዔኤሊንታ ቢልፃሶኦሬ ጎፆ፥ ዳኣኔሌሌ ታ ኮይላ ጌሌኔ፤ ዩይ ዓሢ ጌኡዠ ፆኦዛኮ ዓያና ዒዛይዳ ዓኣ ዓሲኬ፤ ታኣኒ ዒዛም ታኣኮ ዓውቶ ሂዚ ጌይ ኬኤዜኔ። 9 <ዔር ዓሶኮ ሱኡጎ ማዔ ቢልፃሶኦሬ፥ ጌኡዠ ፆኦዛኮ ዓያና ኔ ጊዳ ዓኣሢር ዓኣሽንቲ ባኣዚ

ቢያ ኔና ባሺንዲዋአሢ ታ ዔራኔ፤ ዋይዜ፥ ታኣኒ ዛጌ ዓውቲ ታ ኔኤም ኬኤዛንዳኔ ኔኤኒ ታኣም ቡሌ።»

10 «ታኣኒ ታኣኮ ባርሶይዳ ላሂ ዓኣንቴ ፔቴ ያደሲ ሚሢ ዓጮ ቢያሢኮ ሄኮማካ ባቃሌያ ፔጋዲ ታኣም ጳዴ። 11 ዬይ ሚፃሢ ቶኣካ ዴንዲ ጫሪንጮ ሄላንዳኣና፥ ዓጪ ማዔ ካራና ዓኣ ዓሲ ቢያ ዴንቃኒ ዳንዳዓንዳጉዲ ዴኤፒ ዶዴ። 12 ዒላዠኮ ዋርቁፃ ሚዛጳያ ማዔ። ዓኣፓ ጊንሣ ዴሬ ቢያ ሙዔም ጊዳንዳጉዲ ዲቤኔ፤ ሺባ ካይዚ ቦዎም ገኢጋያ ማዔ። ጫሪንጮ ካፓኣ ካኣፖይዳ ማኣሪ ማዠ ዴዔ። ሺምፔ ዓኣ ባኣዚ ቢያ ዬያ ሚፃሢኮ ዓኣፖ ሙዔ።

13 «ታኣኒ ታኣኮ ባርሶይዳ ላሂ ዓኣንቴ ያኦሲ ታና ፔጋሲ ዳዌ ጎይያና ፔቴ ያኦሲም ዶማዴ ከኢታንቸ ጫሪንጫፓ ኬዳንቴ ታ ዴንቁ። 14 ዒማና ዬይ ከኢታንቻሢ ዴጌ ዑኡሲና፡- ሚፃሢ ቲቁዋቴ፤ ካኣፖ ካኣፖ ዓንጉዋቴ፤ ዒላዠኮ ዠኡዲዋቴ፤ ዓኣፖ ዲኡዚ ዲኡዚ ላኣሉዋቴ፤ ካዮ ቦዓ ዒዛኮ ሺባፓ፤ ካፓኣ ዒዛኮ ካኣፓፓ ቤቲ ዴንደንጎ። 15 ጪኢሪንጉት ዓቴ ዴንጮ ጋዓንቴ ዓንጊና ሞኦና ዓንጊናፓ ኮሾና ካኒ ቢራታና ዓጮ ሺርሺ ቱኪ ሳይዳ ሃሹዋቴ፤ ሳይዳ ዓኣ ዓኣዔ ማኣቶ ባኣካ ዒኢካ ፖዓ ዒዛ ዔቁሲ ሃሹዋቴ።

« ጫሪንጮ ያልካ ዒኢካ ዒዛይዳ ያደንጎ፤ ዬካ ፖይዳ ቦያና ዋላ ማኣቲ ሙይ ሙይ ዒ ናንጎንጎ። 16 ዒዛኮ ዓሱም ማሊፃ ላኣሚንቴም ዴንዲ ላንካይ ለዔ ሄላንዳኣና ቦያ ማሊሢና ናንጎም። 17 ዬያ ጌሰቲ ዔቁሲ ቱኪ ዳኬሢ ያኦሲም ዶማዴ ከኢታንቸ፤ ዬይ ያዲ ማዔሢ ዴኤፖ ያኣዛሢ ሳይዳ ዓኣ ካኣቶኮ ቢቲ ማዔሢ ቢያሢ ዔራንዳጉዲ፤ ዒዚ ዬያ ቢታንቸ ኮዔ ዓሲም ዒንጋኔ፤ ሂርኬ ማዒ ቦሂንቴዛንሢ ዒዚ ዔኪ ቢታንቸ ዓኣያ ማሂ ጌሢ።»

18 «ታኣኒ፥ ካኣቲ፥ ናብካዳናያኦሬ ዛጌ ዓውታ ያዲኬ፤ ዓካሪ ሂንዳ ኔኤኒ ቢልፃሶኦሬ! ታኣም ዬያኮ ቡሊያ ኬኤዜ፤ ታኣኒ ካኣታዲ ዋይሢ ዓጮይዳ ዓኣ ዔሮ ዓሳ ዬያ ቡሊ ታኣም ኬኤዛኒ ዳንዳዑዋሰ፤ ኔኤኒ ጋዓንቴ ጌኤዠ ያኣዘኮ ዓያና ኔ ጊዳ ዓኣሢሮ ኔ ታኣም ኬኤዛኒ ዳንዳዔ።»

ዳኣኔኤሌ ካኣቲኮ ዓውቶ ቡሊሢ

19 ዒማና ቢልፃሶኦሬ ጌይንታ ዳኣኔኤሌ ኮሺ ዑሣ ዓኣዴ ዲቃቴሢሮ፥ ሃሣ ማሊ ሚርጌና ሚታዴሢሮ ዳካ ዋዴ ዘቲ ጌዔ፤ ዬያና ካኣቲ፡- «ቢልፃሶኦሬ! ዓውቶንታ ቡሊያንታ ጌዔ ባኮ ዛሎሮ ሚታዲፖ» ጌዔ።

ቢልፃሶኦሬ ያኣቲ ኮይላ፡- «ካኣቲዮ! ዓውቶንታ ቡሊያንታ ኔኤም ማዒፃ ዓታዛ ኔኤኮ ሞርኮም ሞርኮም ማዒባኣቴ ታኣም

ኮሺታዎኩ። 20 ያዲኩ፡- ቶኦካ ዴንዲ ጫሪንጮ ሄሌያ፤ ሃሣ ዓጮ ቢያይዳ ዓኣ ዓሳ ጉቤ ዴንቃንዳ ፔቲ ዴኤፒ ሚሢ ኔኔኒ ያኦሲ ኔኤም ፔጋሲ ዳዌም ዛጌኔ፤ 21 ዬያ ሚፃሣኦ ሲላዡ ዋዳ ሚርጌና ሚዛጳያኩ፤ ጉቤ ዴር ሙኡዛኒ ዳንዳዓ ሚርጌ ዓኣፒ ሲዛኮ ዓኣኔ፤ ካዮ ቦዓ ሲዛ ሺቦ ዴማ ናንጎንዶ ቤሲ ዴንቁም፡ ካፓኣ ሲዛኮ ካኣፖይዳ ማኣሪ ማዢ ናንጋኔ።

22 «ካኣቲዮ! ያዲሲ፤ ሃሣ ዶዲ ማዔ ዬይ ሚፃሣ ኔናኩ፤ ኔኤኮ ዴኤፑማ ጫሪንጮ ሄላንዳኣና ዴጊ ጴዴኔ፤ ኔኤኮ ቢታንታኣ ዓጮ ጉቤይዳ ጴዳያ ማዒ ዴዔኔ። 23 ካኣቲዮ! ኔኤኒ ዬያ ዛጋንቴ ያኦሲም ዲማዳያ ማዔ ፔቲ ከኢታንታ ጫሪንጫፓ ኩዲ፡- «ሚፃሣ ቲቂ ባይዙዋቲ፤ ቲቂንቴ ዲንጮ ጋዓንቴ ዓንጊና ሞኦና ዓንጊናፓ ኮሸና ካኒ ቢራታና ዓጮ ሺርሺ ቱካዎ ሳዓ ሲኢካ ሃሹዋቲ፤ ዬካፓ ዒ ፖይይዳ ዓኣ ማኣቶ ባኣካ ዴዎንጎ፤ ጫሪንጮ ያልካሢ ሲዛይዳ ያዲ ዑዎ ሲዛኮ ዋዒሶንጎ፤ ዴንዲ ላንካይ ለዔ ሄላንዳኣና ካዮ ቦዎና ዋላ ሲ ናንጎንጎ» ጌዔኔ፤

24 «ካኣቲዮ! ዋይዜ፡ ቡሊፃ ያዲኩ፤ ዴኤፖ ያኦዛሢ ኔና፡ ታ ጎዳሢ፡ ካኣቲዳ ማዲንታንዳጉዲ ማሊ ቱኩ ባካ ሃካፓ ዴማ ከኤዚንታ ጎይዎ ማዓንዳኔ፡- 25 ዴር ባኣካፓ ዳውሲንቲ ዲማዲ ኔ ዴንዳንዳኔ፤ ኔኤኮ ናንጋ ካዮ ቦዎና ዋላ ማዓንዳኔ፤ ላንካይ ለዔ ዓኣዳንዳያ ሄላንዳኣና ጌማይጉዲ ማኣቲ ኔ ሄንቃንዳኔ፤ ጫሪንጮ ያልካ ኔ ጊዳ ያዳንዳኔ፤ ዬይ ቢያ ማዲንታንዳሢ ዴኤፖ ያኦዛሢ ካኣቶ ቢያኮ ቢቲ ማዔሢና ሲ ኮዔ ዓሲም ካኣቲሞ ቢያ ሲንጋሢ ኔ ዔራንዳኣናኩ። 26 ዬይ ጨኢርና ዲንጫ ሳዓ፡ ሲኢካ ዓታንዳጉዲ ዓይሢንቴሢ ያኦሲኮ ዓጮ ቢያሢዳ ቢታንቶ ዓኣሢ ኔ ዔራሰካፓ ላሚ ጊንሣ ኔ ካኣታዳንዳያ ማዒያ ዳዋያኩ፤ 27 ዬያር ካኣቲዮ! ታ ዛሎና ታ ኔኤም ዙራ ዙር ዋይዜ፤ ጎሚ ማዲሢ ሃሺ ኮሺ ማዶ ቢያ ዋዴ ማዴ፤ ፑርቱሞ ሃሺጋፓ ሄርቂንቲ ዋርቃ ዓሶም ሚጨንቲ ኮሺ ባኣዚ ማዴ፤ ኔ ዬያይዴቲ ኮሹሞና ኔ ናንጋንዳ ለዓ ኔኤኮ ያድቃንዳኣ ናንዳኔ» ጌዔኔ።

28 ዬይ ባካ ቢያ ካኣቲ፡ ናብካዳናያኦሪ ሄሌኔ። 29 ታጳ ላምዎ ባጊኮ ጊንፃ ካኣቲ ባብሎኔይዳ ዓኣ ፔኤኮ ካኣቲሞ ማኣርኮ ዴጌ ቤዛ ሃንቲቤቃ፡ 30 ሂዚ ጌዔኔ፡- «ሃኖ ዴኤፖ ባብሎኔ ካታሚሎ ካኣታ ሲኢካ ናንጋንዳጉዲ፤ ሃሣ ዓጮሎኮ ዴኤፖ ካታሞ ሲዛ ማዔም ታኣኮ ቦንቸና ዴኤፑሞና ፔጋዲ ዔርታንዳጉዲ ታ ቢታንቶና ታ ማዢሴያቱሞኣዓዳ?»

31 ዬያ ጌዒ ሲ ጌሰቲ ሃጊ ጋፑሞንቴ ሂዚ ጋዓ ዑኡሲ ጫሪንጫፓ ሙኩኔ፡- «ካኣቲዮ፡ ናብካዳናያኦሪ! ኔ ጊዳ ጌሰቲ ቱኮና ሃይሶ

ዋይዜ! ካኣቱማ ኔ ገዳፓ ዔውቴኔ፤ 32 ኔኤኒ ዴሮ ባኣካፓ ዳውሲንቲ ኬሰኪ ካዮ ሶዮና ዋላ ናንጋንዳኔ፤ ለንካይ ሌዔ ዓኣዳንዳያ ሄለንዳኣና ጌማይጉዲ ማኣቲ ኔ ሄንቃንዳኔ፤ ዬይ ያዲ ማዓንዳሢ ዴኤፖ ያኦዛሢ ሳዖ ካኣቶ ቢያሢኮ ቢቲ ማዔሢና ካኣቱሞዋ ቢያ ዒ ኮዔ ዓሲሞ ዒንጋሢ ኔ ዔራንዳኣናኬ።»

33 ዬይ ጌይንቲ ባካ ኔጉሞዎ ናብካዳናዖኦሬይዳ ማዲንቲኔ፤ ዬያሮ ዒ ዴሮ ባኣካፓ ዳውሲንቲ ኬሰኬኔ፤ ጌማይጉዲ ማኣቲያ ሄንቄኔ፤ ጫሪንጫፓ ኬዳ ያልኮናኣ ዑፃ ዒዛኮ ዋዔኔ፤ ዒዛኮ ዑፃ ጋፓና ዚኢጊሎ ሶሌጉዲ ዑጌኔ፤ ፀንጋኣ ሃሞፑሮ ፀንጋ ማዒ ዴዔኔ።

ናብካዳናዖኦሬ ያኣሲ ጋላቲ ጋላታ

34 ዬይ ዋዳ ዓኣዴሰካፓ ካኣቲ ናብካዳናዖኦሬ ሂዚ ጌዔኔ፡- «ለንካዎ ሌዓ ኩዳዛ ሌካ ዴግ ጌይ ታኣኒ ጫሪንጮ ዛጌኔ፤ ዒናኣ ታኣኮ ጊንሣ ዓሲ ዒኔ ማዔኔ፤ ዴኤፖ ያኦዛሢ ታ ጋላቲኔ፤ ናንጊና ናንጋ ያኦዛሢሞ ሶንቾና ሄርሺሢና ታ ሺኢሺኔ፤

ዒዛኮ ካኣቱማ ናንጊና ናንጋያኬ፤
ዒዛ ካኣቱሞኮ ጋፒንሢ ሳይይ ባኣያኬ፤
35 ሳይይዳ ናንጋ ዴራ ቢያ
ዒዛ ኮይላ ዔኤቢ ፓሠቀ ባኣዚኬ፤

ጫሪንጮ ከኢታንቾይዳኣ ማዖም
ሳይይዳ ናንጋ ዴሮይዳ ዒ ኮዔ ባኣዚ ማዳያኬ፤
ዒ ማዳኒ ማሌ ባኮ ላኣጋኒ ዳንዳዓያና
ኔ ዓይሳ ማዲ ማዲ ዓኣይ? ጋዓንዳ ዓሲ ፔቲታዖ ባኣሴ።»

36 «ታኣኮ ዒና ዓሲ ዒኔ ማዔሰካፓ ኔጉሞዎ ታ ካኣቱሞ ሶንቾንታ ዴኤፑሞንታ ማዒ ጊንሣ ታኣም ዒንጊንቲኔ፤ ታና ዘራ ዓሶና ታኣኒ ዒንጌ ቢታንታ ዓኣ ዓሳኣ ዋዛና ታና ዔኬኔ፤ ዋንዳሰካፓ ባሺ ታኣኒ ሶንቾንቲ ካኣቱሞናኣ ዶዲ ዴዔኔ።

37 «ሃይሾ፤ ታኣኒ ናብካዳናዖኦሬ ጫሪንጮ ካኣታሢ ጋላቲ፡ ሶንቾ፡ ዴኤፒሲያ ታ ዒዛ ዴኤፒሳኔ፤ ዒዚ ማዳ ባካ ቢያ ፒዜኬ፤ ዒዛኮ ሳይያኣ ዲሎ ሳይሢኬ፤ ያቶሮሙሞና ሃንታ ዓሶ ቢያ ዒ ሶርሲሳኒ ዳንዳዓያኬ።»

5

ካኣቲ ቢልፃሶኦሬ ጊኢጊሺ ሙዖ

1 ፔቲ ኬሊ ካኣቲ ቢልፃሶኦሬ ቢታንቶ ዒዚ ዒንጌ ሚርጌ ሺያና ፓይዲንታ ዓሶም ዴኤፒ ሙኡዚ ጊኢጊሺኔ፤ ዒዚ ዬያ ዓሶና

ዎላ ዎይኖ ዑዠ ዑሽኪቤቃ፥ 2 ዴንዲ ማሣሢ ዑካዛ ዒዛኮ ዓዴ፥ ናብካዳናፆኦሬ ዬሩሳላሜ ጌኤዠ ማኣራፓ ዔኪ ሙኬ ዎርቆና ቢሮ ዓንጎናፓ ኮሾና ዑዠ ዑሽኮ ዓንጎ ዔኪ ዬዓንዳጉዲ ማዳ ዓሶ ዓይሤኔ፤ ካኣቲ ዬያ ማዴሢ ቢታንታ ዓኣ ዓሶንታ ዒዛኮ ላኣሎንታ ጊንፃኣ ማቸንሢንታ ዬያ ዓንጎና ዑሽካንዳጉዲኬ። 3 ማዳ ዓሳ ዒማና ዬያ፥ ዬሩሳላሜይዳ ፆኦሲኮ ጌኤዠ ማኣራፓ ዔኪ ሙኪንቲ ዎርቆና ቢሮ ዓንጎናፓ ኮሾና ዑዠ ዓንጎ ኔጉዎፆ ባዔኔ፤ ዬያሮ ካኣቲ፥ ቢታንታ ዓኣ ዴኤፖ ዓሳ፥ ዒዛኮ ላኣሎንታ ጊንፃኣ ማቸንሢንታ ዬያ ዓንጎና ዎይኖ ዑዠ ዑሽኬኔ። 4 ዔያታ ዑሽኪይይዳ ዓኣፆ ዎርቁ፥ ቢራ ዓንጊ፥ ሞኦና ዓንጊንታ ሜሌ ዓንጊ፥ ሚሢንታ ሹቺንታይዳፓ ኮሾና ፆኦዞ ፔኤኮ ጋላቲኔ።

5 ዬያይዳ ጎይሣ ዓኣንቲ ዓሲ ኩቺ ማላ ኩቺ ጌኤዠ ማኣሮይዳ ዓኣ ሻርኖኮ ሆታ ሲልጊዲ ጊኢጊሾና ካኣቲሞ ማኣሮ ኮጮይዳ ዔርቲባኣንቲ ፃኣፒሢሢ ዓርቁኔ፤ ዬያ ፃኣፓሢ ካኣቲ ዴንቁኔ። 6 ዒማና ኔጉዎፆ ዒዛኮ ዓኣፖ ካራ ቦኦሬኔ፤ ዲቃቲፆይዳፓ ዔቁያና ዑፃኣ ጎጋይቁኔ፤ ዎልቃ ጌሌሞ ጨጊጫኣ ቢያ ዒዛኮ ላቤኔ። 7 ዬያሮ ማርሾ ማርሻ ዓሶንታ ዠዎንታ ዠኣፓሢ ዛጋ ዔር ዓሶንታ ዓሳ ዔኪ ጌልዛንዳጉዲ ዒዚ ዒላቲ ኬኤዜኔ፤ ዬይ ዓሳ ዔኤሊንቲ ሙካዛ ዒዚ፡- «ሃያ ፃኣፒንቲ ባኮ ናባቢ ዎዚ ጋዓቲያ ታኣሞ ቡሊ ኬኤዜ ዓሢ ጮልዔ ሚዛጳ ማኣዓሢ ማይንታንዳኔ፤ ዎርቆ ቁንታሢያ ሆላ ታ ዒዛ ማይሳንዳኔ፤ ሃሣ ጊንሣ ታኣኒ ካኣታዲ ዎይሣ ዓጮይዳ ሃይሣሳ ቤዛ ዴዒ ቢታንቶና ዓጮ ዎይሣንዳኔ» ጌዔኔ። 8 ዬና ዔር ዓሳ ካኣቲ ቤርቶ ሺኢኬኔ፤ ጋዓንቲ ዬያ ፃኣፒንቲ ባኮ ናባባኒና ቡሊ ኬኤዛኒ ዳንዳዔ ዓሲ ፔቲታፆ ጴዲባኣሴ። 9 ዬያሮ ካኣቲ ቢልፃሶኦሬ ዑሣ ዓኣዴ ማሊ ሜታዴሞ ዓኣፖ ካራ ዒዛኮ ሃቺሞ ቦኦሪ ቦኦሪ ዓኣዴኔ፤ ቢታንታ ዓኣ ዴኤፖ ዓሶሞ ዎኦቶንደ ጎይሢ ባይቁኔ።

10 ቤርታ ጌኤሾ ማዒ ዓኣ፥ ዒዛኮ ዒንዳ ካኣቲንታ ቢታንታ ዓኣ ዓሶንታ ጋዓ ባኮ ዎይዚ ሙፆ ሙዎ ኬኤፆ ጌላፆ፡- «ካኣቲኖ! ናንጊና ካኣታዲ ናንጌ! ሃያ ባኮሮ ሃያይዲ ማሊ ዓኣፖ ካርዎ ኔ ቦኦሪሳንዳያ ኮይሱዎሴ፤ 11 ጌኤዠ ፆኦዞኮ ዓያና ዓኣያ፥ ፔቲ ዓሲ ኔኤኒ ካኣታዲ ዎይሣ ዓጮ ዓኣኔ፤ ዬይ ዓሢ ኔ ዓዴ ካኣታዲ ዓኣ ዎድና ፆኦዞጉዲ ዔራቶና ማሊ ጰቁሥሢያ ኩሜያ ማዒ ጴዴኔ፤ ዬያሮ ኔኤኮ ዓዴ፥ ናብካዳናፆኦሬ ዠሞኮ፥ ማርሾ ማርሻ ዓሶኮ፥ ዔር ዓሶንታ ዠኣፓሢ ዛጋ ዔር ዓሶንታኮ ቢያ ሱኡጌ ማሢ ዒዛ ደኦሬኔ። 12 ዒዚ ዓዎቲ ቡሊሢና፥ ዓኣቺንቲ ባኣዚ ፔጋሲ ኬኤዚሢሢ ዴማ ዔራቶ ዓኣያ ጨንጮ፤ ሃሣ ዔር ዓሲኬ። ዬያሮ ኔ ዓዴ ናብካዳናፆኦሬ ቢልፃሶኦሬ»

ገይ ሱንፖ ገሠ፤ ዳኣኔኤሌ ዔኤሊሴ፤ ዒዚ ሃያ ቢያ ቡሊ ኔኤም ኬኤዛንዳኔ» ገዔኔ።

ዳኣኔኤሌ ፃኣፖና ባኮኮ ዓኣቲንቴ ማሊፖ ቡሊ ኬኤዛህ

13 ዩካፓ ዳኣኔኤሌ ካኣቲ ቤርቶ ሺኢካዛ፤ ካኣቲ፡- «ታ ዓዴ፤ ካኣቲ፤ ናብካዳናፆኦሬ ዳዒ ዔኪ ሙኬ ዩሁዳ ዓጮ ዓሶ ባኣካፓ ፔቴ ዳኣኔኤሌ ጎፆህ ኔናዳ? 14 ጌኤዦ ፆኦዞር ዓያና ኔ ገዳ ዓኣህና ጨንጨሞንታ ዔራቶንታ ኔኤም ዒንገንቴህ ታ ዋይዜኔ። 15 ታ ቤርቶ ታና ዘራ ዔሮ ዓሶንታ ማርሻ ማርሻ ዓሶንታ ቢያ ፃኣፒንቴ ባኬሎ ናባቢ ቡላንዳጉዲ ዔኤሊንቴ ሺኢኬኔ፤ ጋዓንቴ ዔያታ ታኣም ቡሊ ኬኤዛኒ ዳንዳዒባኣሴ። 16 ኔኤኮ ዓኣቲንቴ ባኣዚና ሜታሳያ ማዔ ባኣዚ ቢያ ቡሊ ዔራ ዔራቶ ዓኣህ ታ ዋይዜኔ፤ ዩያሮ ሃኖ ፃኣፒንቴ ባኬሎ ናባቢ ቡሊፆዋ ታኣም ኔ ኬኤዜቴ ጮልዔ ሚዛፆ ማኣዓህ ታ ኔና ማይሳንዳኔ፤ ዋርቄ ቁንቴያኣ ሆላ ታ ኔኤኮ ማይሴ ታኣኒ ካኣታዲ ዋይህ ዓጮይዳ ሃይህሳ በዛ ዳዒ ኔ ዋይህዳንጉዲ ደኦራንዳኔ» ገዔኔ።

17 ዳኣኔኤሌ ማሃፖ፡- «ካኣቲዮ! ኔ ዒንጋኒ ጋዓ ባካ ኔኤም ማፆንጎ፤ ኔ ቦንቺ ዒንጋ ባኮዋ ማሌ ዓሲም ዒንገ፤ ጋዓንቴ ታ ኔኤም ሃያ ፃኣፖና ባኮ ናባቢ ቡሊፆዋ ኬኤዛንዳኔ፤

18 «ካኣቲዮ! ዴኤፖ ፆኦዞህ ኔ ዓዶ ናብካዳናፆኦሬም ካኣቲሞና ዴኤፑሞና ቦንቺዋ ዒንገኔ፤ 19 ዒዛኮ ዴኤፑሞፓ ዔቁያና ዳማ ዳማ ዓጮይዳ ናንጋ ዓሶና ዳማ ዳማ ዳንጎ ጌሰታ ሃፆና ቢያ ዒዛ ቤርቶይዳ ዒገቺሞና ጎጋይቁ ዒዛም ዋርቄኔ፤ ዒዚ ኮዔ ዓሲ ዋዳኒና ዳቁሻኒ፤ ሃሃ ዒ ኮዔ ዓሲ ሱኡጌ ማሂ ደኦራኒና ሱኡጋታፓ ኬይሳኒ ዳንዳዔኔ። 20 ጋዓንቴ ዒዚ ፆቶርቃያ፤ ዋይዚ ዒፃያ፤ ሃሃ ፑርታ ዓሲ ማዒ ዴዳህሮ ዩይ ቦንቻ ዒዛ ዑፃፓ ጉሲንቴም ካኣቲም ያይታፓ ዒ ኬዳኔ፤ 21 ዴሮ ባኣካፓኣ ዒ ዳውሲንቴኔ፤ ዒዛኮ ዒና ዓሱሞፓ ላኣሚንቴ ቦፖሮ ማዔኔ፤ ዩያሮ ዒዚ ናሽኪባኣፆ ማኣቲ ሄንቁ ሄንቁ ከርሞሌና ዋላ ናንገኔ፤ ዒዚ ዋርቆ ኬኤሲ ባይዜም ዑፆ ዒዛኮ ጨሪንጮ ፆልካህ ዋዒሴኔ፤ ዩይ ያዲ ማዔህ ዴኤፖ ፆኦዞህ ካኣቶ ቢያኮ ዑፃ ቢቲ ማዔህና ካኣቲም ቢታንቶ ቢያ ዔኪ ኮዔ ዓሲም ዒንጋኒ ዳንዳዒዓያታህ ዔራንዳኣናኬ።

22 «ኔኤኒያ ቢልፃሶኦሬ ሃህ ኔ ዒዛ ናይ ማዒፆና ዩያ ቢያ ዔራያታፆ ኔ ቶኦኮ ሂርኪዲ ሽሌዓኒ ዳንዳዒባኣሴ። 23 ኔኤኒ ዩያይዳዎ ጨሪንጮ ጎዳህም ፆቶርቁ ኔና ኔ ዴግ ዴገዳኔ፤ ሃሃ ጌኤዦ ማኣራፓ ቡሪ ዔኪ ሙኮና ዋርቆና ኮሾና ሜሆ ዔኪ ሙኡሲ ኔናንታ ኔኤኒ ቢታንቶ ዒንገ ዓሶንታ ኔኤኮ ላኣኡንታ ገንፃኣ ማቸንሂታ ዋላ ዋይኖ ዑዦ ዑሽኬኔ፤ ዒንሂ ዑሽኬሰካፓ ዛጋኒና

ዋይዛኒ ዳንዳዑዋያ፤ ሃሣ ፔቴ ባኣዚታዎ ዔሩዋ ዋርቆና፤ ቢሮ ዓንጎና፤ ሞኦኖ ዓንጎና ማሌ ዓንጎና፤ ሚሢና ሹቹና ገኢጊሺ ኮሾና ጾኦዞ ዒንሢ ጋላቴኔ፤ ዋዳኒና ዳቁሻኒ ዳንዳዓያ፤ ሃሣ ኔ ናንጋ ናንጎ ቢያ ኔኤኮ ፓይዲ ኔና ዋይሣ ናንገና ናንጋ ጎዳሢ ጋዓንቴ ኔኤኒ ቦንቹባኣሴ። 24 ጾኦሲ ዓሲ ኩቹ ዳኪ ሃያ ባኮ ፃኣፒሴሢ ዜያሮኬ።

25 «ፃኣፒንቴ ባኬላ፡- <ማኔ! ማኔ! ቴቄል! ፓሪሴ፣ ጋዓያኬ።

26 ዬሮኮ ቡሊፃ ያዲኬ፤ ማኔ ጌይፃ፡- <ኔኤኒ ካኣታዲ ዴዓንዳ ዋዶ ኔኤኮ ጾኦሲ ፓይዲ ዛጊ ጋፒንሢ ማዓንዳጉዲ ማሃኔ» ጌይሢኬ።

27 «ቴቄል ጌይፃ፡- «ዴኤሡሞ ዔሮ ባኮና ዛጎዛ ኔኤኒ ሹሌዒ ጴዴኔ» ጌይሢኬ፤

28 «ፓሪሴ ጌይፃ፡- <ኔ ካኣታዲ ዋይሣ ዓጮ ፓቂንቴ ዛላ ሜዶኔ ዓሶሞ፤ ዛላ ጊንሣ ፓሪሴ ዓሶሞ ዒንጊንቴኔ» ጌይሢኬ።»

29 ቢልፃሶኦሪ ዬካፓ ኔጉዋዎ ቦንቹንታያ ማዔ ዳኤፖ ጎዶዞ ማኣዓሢ ዓሳ ዳኣኔኤሌ ማይሳንዳጉዲ፤ ማይንቶ ዋርቆዋ ሆላ ማይሳንዳጉዲ፤ ሃሣ ዒ ካኣታዲ ዋይሣ ዓጮኮ ቢታንቶና ሃይሣሶ ቤዛ ማዔ ዋይሣንዳጉዲ ማሃ ጌሣኔ። 30 ዬማ ዋንቶ ዓሲ ባብሎኔ ካኣቴ ቢልፃሶኦሪ ዋዳኔ፤ 31 ዒማና ላሂታሚ ላሞዎ ለዔ ማዔያ፤ ሜዶኔ ዓጪ ዓሲ፤ ዳኣሪዮሴ ጎዎሰኬይ ዒዛ ካኣቴሞ ዔኪ ቤዛ ካኣታዳኔ።

6

ዳኣኔኤሌ ዘቦ ዔታ ኬኤሪንቴሢ

1 ዳኣሪዮሴ ዒዚ ካኣታዲ ዋይሣ ዓጮ ቢያ ዋይሣንዳጉዲ ፃኤታና ላማታሚ ማዓ ሱኡጌ ዶኦራኒ ኮዔኔ። 2 ሃሣ ጊንሣ ዬያቶ ዓሶ ቢታንቶና ዛጊ ዋይሣንዳጉዲ ዳኣኔኤሌንታ ማሌ ላሞዎ ዓሲያኣ ዒ ዶኦሪኔ። 3 ዒማና ዳኣኔኤሌኮ ማዶ ማዳኒ ዓኣ ዔራታ ዒዛና ዋላ ዬኖ ዓጮ ዋይሣ ዓሶንታ ቢታንታ ዓኣ ዓሶንታፓ ቢያ ባሼ ማዔሢ ዳኣኔኤሌ ማዶና ፔጋሲ ዳዌኔ፤ ዬያሮ ካኣቴ ካኣታዲ ዋይሣ ዓጮይዳ ቢያ ቢታንቶ ዓኣ ሱኡጌ ማሃ ዳኣኔኤሌ ዶኦራኒ ማሌኔ። 4 ዬካፓ ዒዛና ዋላ ዓጮ ዋይሣ ማሌ ዓሶንታ ቢታንታ ዓኣ ዓሶንታ ዳኣኔኤሌ ዬኖ ዓጮይዳ ዒንጊንቴ ቢታንቶና ማዳ ባኮይዳ ዳቢንቴ ዴንቁ ዋጌና ዒዛ ዓይሢሳኒ ኮዔኔ፤ ጋዓንቴ ዳኣኔኤሌ ፔና ኮሺ ካፓያ፤ ሃሣ ጉሙርቂንታ ዓሲ ማዔሢሮ ፔቴታዎ ዳቢንቴ ዔያታ ዒዛይዳ ዴንቃኒ ዳንዳዒባኣሴ። 5 ዬያሮ ዔያታ ዋላ፡- «ዒዚ ካኣሻካ

5:29 5:29 ማኸ. ማፃ 41:42።

የኦሳዳ ዘሎና ማዕባኔቱ ዋጌና ኑ ዳኣኔኤሌ ዓይሢሳንዳ ዳቢንቲ ኑ ዳንቃኒ ዳንዳዒባኣሴ» ጌይ ዘርቴኔ።

6 ዩካፓ ዓጮ ዋይሢ ዓሶና ቢታንታ ዓኣ ዓሶና ዋላ ጌኔ ጌኤሲ ጌሰቲ ቱኪ ካኣቲ ከይላ ሙካዖ፡- «ካኣቲዮ፡ ዳኣሪዮሴ! ኔኤኒ ናንጊና ካኣታዲ ናንጌ! 7 ኑኡኒ ኔ ካኣታዲ ዋይሢ ዓጮይዳ ዓሶ ዋይሢያ ማዶ ማዳ ዳኤፖ ዓሳ፡ ዋጎ ኮሺ ዔራ ዓሳ፡ ሱኡጋ፡ ኔና ዘራ ደንዘንታ ቢታንታ ዓኣ ዓሳ ኑ ዋላ ፔቲ ጌሰቲ ሙኬ ባኣዚ ዓኣኔ፤ ዬና ዓይጎዳይ ጌዔቲ ሃይማፓ ዓርቃዖ ዳንዲ ሃይሢታሚ ኬሊ ሄላንዳኣና ኔናቱዋንቲ ሜሌ ዓይጎ የኦዘታቲያ ዓሲ ሺኦቂ ካኣሽኩዋጉዲ ከኢታ ኔ ከሲ ዳካንዳጉዲከ፤ ዬያ ዓይሢያ ከኢቶ ዋይዚ ዒፃ ዓሲ ጳዴቶ ዘቦ ዔታ ዓጊንታንዳጉዲ ዓይሢ። 8 ዋይዜ ካኣቲዮ! ዬይ ዓይሢያ ከኢታ ሜዶኔና ፓሪሴና ዋጎጉዲ ደዲ፤ ሃሢ ላኣሚንቱዋዖ ማዓንዳጉዲ ኔ ዓይሢያ ማዓሢ ዔርዘ ማላቶ ጊዳ ዓይሢ» ጌዔኔ። 9 ዬያር ካኣቲ ዳኣሪዮሴ ዬያ ዓይሢያ ከኢቶ ዒ ጌዔያ ማዒያ ዔርዘ ማላቶ ጊዳ ዓይሢ ደዲ ማሃ ኬሴኔ። 10 ዳኣኔኤሌ ዒማና ዬይ ዓይሢያ ከኢታ ካኣቲ ፔ ጌዔያ ማዔሢ ዔርዘ ማላቶና ፃኣፒንቲ ኬሰኬሢ ዔራዖ ዒዚ ናንጋ ኩሶ ኬኤፃ ዬሩሳላሚ ካታዋኮ ሆታ ኬኤፃኮ ፑልቶ ካራ ቡሎዘ ጳዴዳያታንቲ ዒዚ ቤርታኣፓ ማዳ ጎይዖ ጉኡዠና ሳዓ ጉምዓቲ ፔኤኮ የኦዘሢ ጋላቲ ጋላቲ ፔቲ ኬሊዳ ሃይሢ ማይንቲ ሺኦቃ ሺኦጲያ ሺኦቄኔ።

11 ዬያታ ጌና ማሊያ ጌሰቲ ዓሳ ዋሊ ዑፃ ሃሢ ዳንዲ ዳኣኔኤሌ ፔኤኮ ፔና ማዜ የኦዘሢ ሺኦቃንቲ ዳንቄኔ። 12 ዩካፓ ዔያታ ፔቲይዳ ካኣቲ ከይላ ዳንዲ ዓይሢያ ከኢቶ ኬሶናሢ ዳኣኔኤሌ ካፒባኣያ ማዒያ ሂዚ ጌይ ኬኤሴኔ፡- «ካኣቲዮ፤ ዳንዲ ሃይሢታሚ ኬሊ ሄላንዳኣና ኔናቱዋንቲ ሜሌ ዓይጎ የኦዘታ ማዖም ዓሲ ሺኦቂ ካኣሽካ ዓሲ ዘቦ ዔታ ዓጊንታንዳጉዲ ዓይሢሢ ከኢታ ኔ ጌዔያ ማዒያ ዔርዘ ማላቶና ዓይሢ ኔ ኬሰባኣዓዳ?»

ካኣቲ ዒማና፡- «ሂዮ፤ ሜዶኔና ፓሪሴና ዋጎጉዲ ደዲ፡ ሃሢ ላኣሚንቱዋ ዓይሢሢ ከኢታ ታ ኬሴኔ» ጌዔኔ።

13 ዬያር ዔያታ፡- «ሂዳዖ ሃሢ ካኣቲዮ! ዲዒ ዔኪ ሙኮና ዪሁዳ ዓሶ ባኣካፓ ፔቲሢ ማዔ፡ ዳኣኔኤሌ ኔና ቦንቹዋሴ፤ ኔኤኒ ማላቶ ጊዳ ዓይሢ ኬሴ ዓይሢያ ከኢቶ ካፖ ዒፃ፡ ፔቲ ኬሊዳ ሃይሢማይንቲ ፔ የኦዘሢ ሃይሾ ዒ ሺኦቃንቲዋ» ጌዔኔ።

14 ካኣቲ ዬያ ዋይዘዖ ሚርጌና ዖይኔ፤ ዩካፓ ዳኣኔኤሌ ዓውሳኒ ማሌኔ፤ ዳንዲ ዓባ ጌላንዳያ ሄላንዳኣና ዒዛ ዓውሶንዶ ካራ ሚርጌ ኮዔኔ።

15 ሃሣ ዬና ዓሳ ካአቲ ኮይላ ፔቱሞና ሙኪ:- «ካአቲዮ! ሜዶኔና ፓሪሴ ዎጎ ጎይዖና ፔቱ ካአቲ ከሴ ዓይሥሣ ኪኢታኣ ማፃሞ ሜሌ ኪኢታ ላኣሚንታኒ ዳንዳዑዎኣሣ ዔሬ!» ጌዔኔ።

16 ዬያሮ ዳኣኔኤሌ ዓርቂንቲ ዘቦ ዔታ ዓገንታንዳጉዲ ካአቲ ዓይሣኔ፤ ዒማና ዒዚ ዳኣኔኤሌ ኮይላ:- «ቢያ ዎዴ ኔ ጉሙርቂንቲ ዒዛም ማዳ ያኣዛሣ፤ ዒ ኔና ዓውሶንጎ» ጌዔኔ። 17 ዬካፓ ዬይ ዔቶ ካራ ዴኤፒ ሹቸና ዎዲንቲኔ፤ ዓይጎ ዓሲያኣ ማፃሞ ዳኣኔኤሌ ዬይፓ ከሴ ዓውሳኒ ዳንዳዑዎጉዲ ካአቲ ዒዚ ዎይሣ ዓጮይዳ ዒ ጌዔያ ማዒያ ዔርዛ ማላቶና፤ ሃሣ ዒዛኮ ደንዛ ጌዔያ ማዒያ ዔርዛ ማላቶ ዊ ዊ ዳይሣኔ። 18 ዬያይዳዎ ካአቲ ፔኤኮ ካኣቱሞ ማኣሪ ማዒ ዴንዴኔ፤ ዒማና ዒ ሙኡዚያ ሙይባኣሴ፤ ዒዛ ዎዛሳንዳ ባኣዚ ዓሳ ዒዛም ሺኢሹዎጉዲ ላኣገ ገንፖ ዓቲ ዬና ዎንቶ ዎርቄ።

19 ዬካፓ ሃገ ሳባኮ ደገቺ ዘዘቃኣና ካአቲ ገንዓሰካፓ ዔቂ ኔጉዎፖ ዘቦ ዔቶ ካሮ ዓኣዳኔ። 20 ዒዚ ዒኣኣ ሄላፖ ያዬ ዑኡሲና:- «ናንገና ናንጋ ያኣዛሣ ማዳሣ፤ ዳኣኔኤሌ! ቢያ ዎዴ ጉሙርቂንቲ ኔኤኒ ማዳ ያኣዛሣ ዘቦይፓ ኔና ዓውሳኒ ዳንዳዒያ?» ጌይ ዔኤሌንቲ።

21 ዳኣኔኤሌ ማሃዖ:- «ካአቲዮ! ናንገና ካኣታዲ ናንጌ! 22 ዘባ ታና ዔኤቢ ዎኦቱዎጉዲ ያኦሲ ፔኤኮ ኪኢታንቻሣ ዳኪ ዳንጎ ዘቦኮ ዓርቄኔ፤ ዬያ ዒ ማዳሣ ታኣኒ ዒዛ ቤርታ ጌኤሽ ማዔሣርና ኔኤማኣ ታኣኒ ፑርታ ባኣዚ ማዲባኣሣ ዔሬሣርከ» ጌዔኔ።

23 ዬያሮ ካአቲ ኮሺ ዎዛዳኔ፤ ዳኣኔኤሌያ ዓሳ ዘቦ ዔታፓ ከሳንዳጉዲ ዓይሣኔ፤ ዒዚ ያኦሲ ጉሙርቄያታሣር ዓሳ ዒዛ ዘቦ ዔታፓ ከሳኣና ዑይይዳ ዒዛኮ ዘባ ፔቲታዎ ዔኤቢ ዎኦቲባኣሣ ዓሳ ዘገ ዔሬኔ። 24 ካአቲ ዒማና ገንሣ ዳኣኔኤሌ ዎጎና ዓይሣሴ ዓሳ ዓርቂንቲ ዬዓንዳጉዲ ዓሲ ዳከኔ፤ ዬያሮ ዔያታ ዓርቂንቲ ዔያቶኮ ላኣሎንታ ናኣቶንታ ዎላ ዘቦ ዔታ ዓገንቲኔ፤ ዔያታ ሃገ ዘቦ ዔቶኮ ካሮ ሞሞኦኣኣና ዘባ ዔያቶ ሾኦሊ ላኣሊ ሜጌዎባ ቢያ ሜንሣኔ።

25 ዬካፓ ካአቲ ዳኣሪዮሴ ዓጮይዳ ዓጮይዳ ናንጋ ዴርና ዲማ ዲማ ሙኡጮ ጌሰታ ፃፅናም ሂዚ ጋዓያ ፃኣፒ ኪኢታ ዳከኔ:-

«ዒንሣ ቢያሣ ዎዚ ኮሺዳ?» 26 ታ ዓጮይዳ ናንጋ ዴራ

ቢያ ዳኣኔኤሌ ያኣዛሣ ዒገጫንዳጉዲና ቦንቺ ካኣሽካንዳጉዲ ታ ዓይሣኔ፤

«ዬይ ያኣዛሣ ሽሞፔና ማዒ ናንገና ናንጋ ያኦሲከ፤

ዒዛኮ ካኣቲማኣ ባይቁዎኣያከ፤

ዒዛ ካኣቲሞኮ ጋፒንሣ ባኣያከ፤

27 ዒዚ ዓውሳኔ፥ ፑርታ ባኣዚፓኣ ካፓኔ፤

ዒዚ ጫሪንጮና ሳዖናይዳ ፔ ዎልቁና ማዲንታ ዓኪ ባኣዚ ማዲያኬ፤

ዒዚ፣ ዬይ ያኦዛሢ ዳኣኔኤሌ ዘቦ ሲንጋፓ ዓውሴኔ።»

28 ዬያሮ ዳኣኔኤሌ ካኣቲ ዳኣሪዮሴ ዎዶና፤ ሃሣ ገንሣፓሪሴ ካኣቲ ቁኢሮሴ ዎዶናኣ ቢያ ቦንቲንቴ ጎይሣ ናንጌኔ።

7

ዳኣኔኤሌም ያኦሲ ፔጋሲ ሲቁ ያይዶ ቦዖና ዬያኮዎ ቡሊያ (7:1—12:3)

1 ባብሎኔ ካኣቲ ቢልፃሶኦሬ ካኣታጅ ቤርታሳ ሌዖና ዳኣኔኤሌ ፔኤኮ ሻኣሎይዳ ላሂ ዓኣዖ ያኦሲ ፔጋሲ ሲቁ ባኣዚ፣ ሃሣ ዓውቲያ ዘጌኔ፤ ዬካፓ ዒ ዬያ ዘጌ ባኮ ፃኣፔኔ።

2 ዒዚ ሂዚ ጌዔኔ፡- «ታኣኒ ዳኣኔኤሌ ያይዶ ዛላፓ ዔቁ ጅኤፒ ጉዳ ባዞ ዎኣዖ ዓገሣንቴ ያኦሲ ሲቁም ፔቲ ዎንቴና ዘጌኔ። 3 ዒማና ያይዶ ዱማ ዱማ ጅኤፒ ቦዖ ባዛፓ ኬሰኬኔ። 4 ቤርታሳ ቦዓሢ ዘቢ ማላያኬ፤ ዒዛኮ ኮኣኬ ጋኣሲ ማላ ጋኣሲ ዓኣኔ፤ ዒማና ታዛጋ ጎይሣ ዓኣንቴ ዬይ ጋኣዛ ዒዛኮ ቱገንቴኔ፤ ዬይ ቦዓሢ ገንሣ ጅግ ጌይ ዓሲጉዲ ላምዖ ቶኪና ዔቁኔ፤ ዓሲ ዒኔያ ዒዛም ዒንገንቴኔ።

5 «ላምዓሳ ቦዓሢ ገንጎ ቶኮ ሉኡቢ ዔቁ፣ ዲቤ ጌይንታ ቦዓሢ ማላያኬ፤ ዬይ ፔኤኮ ዓጮና ሃይሣ ባራንሢ ማጌሢ ሲቁ ዓርቁ ዓኣኔ፤ ዒዛም፡- «ኔ ኮዔ ዓሸኪ ዘቲ ጋዓዖ ሙዔ፤» ጋዓ ዑኡሲና ኬኤዚንቴኔ።

6 «ዬያ ታ ዛጋ ጎይሣ ዓኣንቴ ማሌ ማኣኪ ማላ ቦዖ ኬሰኬኔ፤ ዒዛኮዎ ካፒ ጋኣሲ ማላ ያይዶ ጋኣሲ ዙሎይዳ ዓኣኔ፤ ሃሣ ያይዶ ቶኣኪያ ዓኣኔ፤ ዒዛም ዎይሥሢ ቢታንቶዎ ዒንገንቴኔ።

7 «ዬካፓ ሃሣ ያይዳሳ ቦዖ ታ ዳንቁኔ፤ ዬይ ቦዓሢ ዒጊቻያ፣ ዲቃሣያ፤ ሃሣ ፑኡፒ ደዲ ቦዖኬ፤ ዬያ ቦዓሢኮ ጫሃያና ሲቁ ማንሣ ጅኤፒ ጅኤፒ ዓንጊ ዓቸ ዓኣኔ። ዓቲ ባኮ ዒ ፔኤኮ ቶኮና ሄርቃኔ፤ ሃንጎ ቦዖይዳፓ ቢያ ዱማ ታጾ ካኣሪ ዒዛኮ ዓኣኔ። 8 ታኣኒ ዬያ ካኣሮ ዛሎ ማላ ጎይሣ ዓኣንቴ ዬያ ካኣሮ ባኣካ ማሌ ሲቁ ካኣሪ ኬሰኬኔ፤ ዬማ ካኣሮማም ቤዞ ሃሻኒ ዎንዴ ዓኣ ካኣራፓ ሃይሣ ካኣሪ ቱገንቴኔ፤ ዬማ ሲኮ ካኣሮማኮ ዓሲ ዓኣፒ ዓኣያ፣ ሃሣ ያቶርቁ ጌሰታ ዒንዲርሲያኣ ዓኣያኬ።

7:3 7:3 ዮሃ. ያፔዳ 17:8። 7:6 7:6 ዮሃ. ያፔዳ 13:2። 7:7 7:7 ዮሃ. ያፔዳ 12:3፤ 13:1። 7:8 7:8 ዮሃ. ያፔዳ 13:5-6።

ናንገና ሼምፔና ዓኣ ማዒ ናንጋሢ ዛሎ ፔጋሲ ዳዋና ባኣዚ

9 «ታኣኒ ዬያ ዛጋ ጎይሣ ዓኣንቴ ካኣታ ዳዓ ያይታ ገሢሃንቴ፤ ዬይ ሚናንካፓ ዓኣሢ ዬያ ያይቶይዳ ዳዔ፤ ማኣዓሢ ዒዛኮ ሻቸጉዲ፣ ቶኣኮ ጋማኣ ፑኡታጉዲ ቦኦራያኬ፤ ዒዚ ዳዔ ካኣቶ ያይቶኮ ሺራ ቶካ ዔዔኤታ ታሚጉዲ ዜኤሊንሣያኬ። 10 ዒዚ ዳዔ ካኣቶ ያይቶኮ ቤርታፓ ታሚ ዓልቃ፤ ዒዛሞ ማዳ ሚርጌ ሺያና ፓይዲንታ ዓሲ ዓኣ፤ ገንሣ ሃሣ ፓይዲፓ ዑሣ ዓኣዳ ዓሲያኣ ቤርታ ዒዛኮ ዔቂ ዓኣ፤ ዒማና ጌኤሲ ጌሰቲ ቲቃኒ ሃይሴ ዓርቂንቴ፤ ማፃኣፔያ ቡሊንቴ።

11 «ዬማ ያቶርሙሞና ጌሰታ ካኣሮማ ፖኦሊንቴ ጌሰታ ዑኡዛ ታ ዋይዛያ ዒማ ዛጌ፤ ዒማና ታ ዛጋ ጎይሣ ዓኣንቴ ዬይ ቦዓሢ ዋዲንቴ ታሚዳ ዓገንታዛ ታማ ዒዛ ሙይ ባይዜ። 12 ማሌ ቦፆኮዋ ቢታንቱሞ ዋልቃ ዔሙቴ፤ ጋዓንቴ ዳካሮ ሼምፔና ዔያታ ናንጋንዳጉዲ ዔያቶ ሃሸና።

13 «ዬኖ ታና ያኦሲ ፔጋሲ ዳዋሞ ታ ዛጌ ዋንቴሎና ዓሲ ናዓሢ ማላ ዓሲ ሻኣሬ ዓጮ ማንጌሞ ሙካያ ታ ዛጌ፤ ዬያ ዔኪ ናንገና ናንጋሢ ቤርቶ ሺኢሸና። 14 ዱማ ዱማ ዓጮይዳ ናንጋ ዴርንታ ዱማ ዱማ ሙኡጮ ጌሰታ ፃጰንታ ዒዛሞ ማዳንዳጉዲ ቢታንቶ፣ ቦንቸንታ ካኣቱሞንታ ዒዛሞ ዒንገንቴ፤ ዒ ካኣታዲ ዋይሣ ዓጮ ባይቁዋያ ናንገና ናንጋያኬ፤ ዒዛ ካኣቱሞኮ ጋፒንሢ ባኣያኬ።

ያኦሲ ፔጋሲ ዳዋ ባኮኮ ቡሊያ

15 «ታኣኒ ዳኣኔኤሌ ዬኖ ዛጌ ባኬሎ ዛሎ ማሊ ኮሺ ሚታዳ። 16 ዬያሮ ዒኢካ ዔቂ ዓኣዘንሢፓ ፔቴሢ ባንሢ ታኣኒ ዶጪ ዬያ ቢያ ባኮኮ ጎፎ ቡሊያ ያኦጮ፤ ዒዚያ ታኣሞ ዬያ ቢያኮ ቡሊያ ኬኤዜ። 17 ዒ ታኣሞ ኬኤዛዎ፡- ሃንሢ ያይዶ ዴኤፖ ዴኤፖ ቦፆንሢ ሳያይዳ ካኣታዳንዳ ያይዶ ካኣቶኬ። 18 ጋዓንቴ ዴኤፖ ያኦዛሢሞ ዱማዳዘንሢ ዬያ ካኣቱሞ ዔኪ ናንገና ዔያቶሮ ማሢ ዓይሳንዳ። ጌዔ።

19 «ዬካፓ ሃሣ ታኣኒ ማሌ ቦፆይዳፓ ቢያ ዱማ ማዔ፣ ያይዳሳ ቦዓሢ ዛሎ ባሽና ዔራኒ ኮዔ፤ ዬይ ቦዓሢ ሚርጌና ዒጊቻያ፣ ኬሚ ዴንቁ ባኮዋ ቢያ ዓንጎ ዓጮና ዳይ ማንሢ ማንሢ ሞኦና ዓንጎ ፀንጎናኣ ሸኦሊ ሸኦሊ ሙዓያ፤ ዓቴሢ ቶኪና ሄሄርቃያኬ። 20 ገንሣ

7:9 7:9 ዮሃ. ያፔዳ 20:4፤ 1:14። 7:10 7:10 ዮሃ. ያፔዳ 5:11፤ 20:12።
7:13 7:13 ማቴ. 24:30፤ 26:64፤ ማር. 13:26፤ 14:62፤ ሉቃ. 21:27፤ ዮሃ. ያፔዳ 1:7፤ 13፤ 14:14። 7:14 7:14 ዮሃ. ያፔዳ 11:15። 7:18 7:18 ዮሃ. ያፔዳ 22:5።

ታኣኒ ዬያ ቦዓሂኮ ቶኦካ ዓኣ ታጾ ካኣሮ ዛሎና ገንፃፓ ኬሰኬ ዳኮ ካኣሮማ ዛሎ፤ ሃሣ ዬማ ዳኮ ካኣሮማም ቤዘ ሃሻኒ ቱገንቴ ሃይሃ ካኣሮ ዛሎዋ ዔራኒ ታ ኮዔኔ። ዬማ ዳኮ ማኣሮማኮ ዓኣፒና ዳንጋና ዓኣያኬ፤ ዒማ ሃንጎዋቶይዳፓ ቢያ ባሼ ዒጊቻያ፣ ያቶርቂ ጌሰታያኬ።

21 «ታኣኒ ዬያ ዛጋ ጎይሣ ዓኣንቴ ዬማ ዳኮ ካኣሮማ ያኦሲም ዲማዴዘንሢ ዶልዚ ቡሊ ዬያቶ ባሼኔ። 22 ዬይ ያዲ ማዔሣ ናንጊና ናንጋሢ ሙኪ ዴኤፖ ያኦዛሢም ዲማዴዘንሢም ፒዜ ዋጌ ዋጋንዳማ ሄላንዳኣናኬ፤ ዬያታ ያኦሲም ዲማዴዘንሢ ዬያ ካኣቱዋ ዔካ ዋዳ ሄሊኔ።

23 «ዒዚ ታኣም ዬያኮ ቡሊፃ ኬኤዛያ፡- ስይዳሳ ቦዓሢ ሳይይዳ ካኣታዳንዳ ያይዳሳ ካኣቶኬ፤ ዬይ ካኣታሢ ካኣቶ ቢያፓ ባሼ ማዔሣሮ ዓጮ ቢያ ፔ ዴማ ማሂ ዓርቂ ሄርቂ ዋይሣንዳኔ።

24 ታጾ ካኣሮንሢ ዬያ ካኣታሢ ጋራፓ ኬሰካንዳ ታጾ ካኣቶኬ፤ ዬካፓ ቤርታኣሮንሢፓ ዲማዴያ፣ ሜሌ ካኣቲ ኬሰኪ ዬንሢ ታጾ ካኣቶንሢፓ ሃይሃንሢ ሎንሣንዳኔ፤ 25 ዬይ ካኣታሢ ዴኤፖ ያኦዛሢም ዋይዘ ዒዲ ያቶርቂ ጌሰታንዳኔ፤ ዴኤፖ ያኦዛሢም ዲማዴዘንሢ ዒ ሜታሳንዳኔ፤ ያኦሲም ዲማዴያ ማዔ ቦንቾ ኬሎንታ ዋጎንታ ላኣማኒ ዒ ጊኣገንታንዳኔ፤ ያኦሲም ዲማዴዘንሢ ሃይሃ ሌዔና ዛላና ዒዛ ቢታንቶ ዴማ ዋርቃንዳኔ። 26 ዬካፓ ዴዒ ዋጌ ዋጎንዳ ካኣቶ ያይታ ጌሢንታንዳኔ፤ ዬያሮ ዬያ ያቶር ካኣታሢኮ ቢታንቶ ዋልቃ ዔውቴም ናንጊና ዒ ጋፒ ባይቃንዳኔ፤ 27 ጫሪንጮ ቢያኮ ዴማ ሳይይዳ ዓኣ ካኣቶኮ ቢታንታ፣ ዋልቆንታ ዴኤፑዋንታ ቢያ ዔውቴ ዴኤፖ ያኦዛሢም ዲማዴዘንሢም ዒንገንታንዳኔ፤ ዬያታ ካኣታዲ ዋይሣንዳ ቢታንታ ዔያቶኮ ናንጊና ዶዲ ናንጋንዳኔ፤ ዓጮይዳ ዓጮይዳ ዋይሣ ዓሳ ቢያ ዒዛም ዓይሢንቲ ማዲ ናንጋንዳኔ ጌዔኔ።»

28 ዬያ ታኣኒ ዛጌ ባኮኮ ቡሊፃ ያዲና ጋፔኔ፤ ታኣኒ ዳኣኤሌ ዬያ ባኮ ኮሺ ዒጊጮኔ፤ ዲቃቲፃፓ ዔቄያና ዓኣፖ ካራ ታኣኮ ቦኦሬኔ፤ ያዲ ማዔቴያ ቢያ ባኮ ታኣኒ ታ ዒና ዓርቂኔ።

8

ዳኣኤሌም ያኦሲ ፔጋሲ ዳዋ ዓዴ ማራይና ኮላይና

7:21 7:21 ዮሃ. ያፔዳ 13:7። 7:22 7:22 ዮሃ. ያፔዳ 20:4። 7:24 7:24 ዮሃ. ያፔዳ 17:12። 7:25 7:25 ዮሃ. ያፔዳ 12:14፤ 13:5-6። 7:27 7:27 ዮሃ. ያፔዳ 20:4፤ 22:5።

1 ቢልጥሶኑ ካታደንገቴ ሃይሃሳ ሌዖና ታኣኒ፥ ዳኣኔኤሌ ሃያኮ ቤርታ ዛጌሰካፓ ዲማ ማሌ ባኣዚ ዛጌኔ፤ 2 ታኣኒ ዔላኣማ ዓጮይዳ ኮይሎ ከኤሎ ዲዖና ዲርቆና፥ ሱሳ ካታሞይዳ ዓኣያ ያኦሲ ፔጋሲ ዲሞም ታ ዛጌኔ፤ ዓማና ታኣኒ ዑላዬ ዎሮ ዓጮ ዔቁ ዓኣኔ። 3 ዬኖ ዎሮ ዓጮ ላምዖ ያደሲ ካኣሪ ዓኣ ፔቴ ዓዴ ማራይ ዔቁ ዓኣኔ፤ ዬንሢ ላምዖ ካኣሮንሢፓ ፔቴ ካኣራ ጊንፃዲ ከሰከያ ማዔቴያ ባሳ ካኣሮፓ ባሽ ያደቃያ ማዔኔ። 4 ዬይ ማራዓሢ ዬያ ካኣሮና ዲዓኒ ጊኣጊ ዓጮኮ ዓባ ጌላ ባንሢ፥ ከደ ዛሎ ባንሢ፥ ደኣሎ ዛሎ ባንሢ፤ ጊንሣ ሃሣ ሊኮ ዛሎ ባንሢ ዴንዳኒ ጋዓያ ታ ዛጌኔ፤ ዬያ ማራዓሢኮ ቤርታ ዔቃኒና ዬያኮ ዎልቃፓ ቶሊ ዓታኒ ዳንዳዔ ቦዖ ፔቴታዖ ጴዲባኣሴ፤ ዬይ ማራዓሢ ኮዔ ባኣዚ ማዲ ማዲ ሃቸም ደዴ።

5 ዬያ ታ ዛጌ ባኮ ማላ ጎይሣ ዓኣንገቴ ላምዖ ዓኣፖኮ ባኣካ ዴኤፒ ካኣሪ ከሴ ፔቴ ኮላይ ዓጮ ቲቁ ቶኪና ሳዓ ሄርቁዎዖ ዓባ ጌላ ባንፃፓ ባራኒ ሙከኔ። 6 ዬይ ዎኣራሢ ዎሮ ዓጮይዳ ዔቁ ዓኣንገቴ ታ ዛጌ፥ ላምዖ ጉራና ዓኣ ማራዓሢ ባንሢ ዲጋና ጉንጊ ሙከኔ። 7 ዓዚ ማራዓሢ ባንሢ ደጫሢ ታ ዛጌኔ፤ ዬካፓ ዓ ማራዓሢዳ ዲጋና ዔቁ ዲዎዖ ላምዖ ካኣሮ ማራዓሢኮ ማንሢ፤ ማራዓሢኮ ዓማና ዓዚ ቃዛንዳ ዎልቁ ባይቁኔ፤ ዬያሮ ዎኣራሢ ዓዚ ሳዓ ባጊ ቶኪና ሄርቁኔ፤ ዬያ ዎኣራሢፓ ዓዚ ዓውሳኒ ዳንዳዔ ባኣዚ ባኣሴ።

8 ዬይ ዎኣራሢ ዑሣ ዓኣዴ ደዳያ ማዔኔ፤ ዬይ ዎኣራሢ ፔቶ ዎልቃዲ ዎፓ ዓቁያና ዓዚኮ ደደ ጉራና ማቁኔ፤ ዬካፓ ቤዘይዳ ያይደ ዴኤፒ ዴኤፒ ካኣሪ ከሰከኔ፤ ዬይ ፔቴ ፔቴ ካኣራ ያይደ ዛሎ ባንሢ ቢያ ሺሬያከ፤ 9 ዬንሢ ያይደ ካኣሮንሢፓ ፔቴማይዳ ማሌ ዳካ ካኣሪ ከሰከኔ፤ ዬማ ዳኮ ካኣሮማኮ ዎልቃ ዓጮኮ ደኣሎ ዛሎ ባንሢ፥ ዓባ ከሰካ ዛሎ ባንዖና ኮዦ ዓጮሎ ባንሢያ ዑጊ ዑጊ ዓኣዴኔ። 10 ሃሣ ጊንሣ ጫሪንጫ ዓኣ ዎልቆና ዓኣ ባኮ ሄላንዳኣናኣ ዴግ ጌይ ዑጌኔ፤ ዑሣ ዓኣዴ ደዳያ ማዔኔ፤ ዬያ ጫሪንጫይዳ ዎልቆና ዓኣ ባኮይዳፓ ዛሎ ሳዓ ከይሲ ዒ ቶኪና ሄርቁኔ። 11 ዬማ ካኣሮማ ጫሪንጫይዳ ዎልቆና ዓኣ ባኮኮ ሱኡጋሢታዖ ማታሴኔ፤ ቢያ ከላ ከላ ዒዛም ዒንጎ ባኮዎ ላኣጊ፥ ጌኤዦ ማኣሮዎ ዒኣሴኔ። 12 ዮርቱሞፓ ዔቁያና ዬያኮ ያሎ ዓሶንታ ቢያ ከሊ ዒንጎ ባካኣ ዓውቲ ዬማ ካኣሮማም ዒንጊንገቴኔ፤ ዒማ ጎኑሞ ዔኪ ሳይደ ከኤሬኔ፤ ዒማ ማዲ ባካ ቢያ ዒማም ጊኢጋያ ማዔኔ።

13 ዬካፓ ፔቴ ጌኤሺ ማዔ ያኦሲ ከኢታንቸ ጌሰታንገቴ ታ ዎይዜኔ፤ ዒማና ፔቴ ሃሣ ጌኤሺ ከኢታንቸሰከይ ዬያ ጌሰቴሢ ኮይላ፡- «ዬንሢ ያኦሲ ፔጋሲ ዳቁ ባኮንሢ ማዲንገቴ ኩማንዳ ዎዳ

ዓይዲዳይ? ባይሲንቶ ዔኪ ሙካ ፑርቶ ባኮንታ ቢያ ዎዴ ዒንጊንታ ዒንጊያ ላኣጊ ፔኤም ማሂ ዒ ዴዓሂ ዎማ ሄላንዳኣናዳይ? ሃሃ ጌኤዠ ማኣሮንታ ጫሪንጫ ዎልቆና ዓኣ ባኮንታ ዒ ዛም ዒንጊንቲም ሄርቁንቲናንጋንዳሂ ዓይዲ ሄላንዳኣናዳይ?» ጌይ ያኦጩኔ።

14 ዬይ ያኦጩንቲ ኪኢታንቻሂ ማሃዎ፡- «ጉቶና ዒባኖና ዒንጎ ባንጊያ ዒንጊንቲዎዎ ዴዓንዳሂ ላምዎ ሺያና ሃይሃ ዌኤታና ኬሊኬ፤ ዬካፓ ዒኢቲ ጌኤዠ ማኣራ ጌኤሸካንዳኔ» ጋዓንቲ ታ ዎይዜኔ።

ያኦሲ ፔጋሲ ዳዌ ባኮ ኪኢታንቻሂ ጌብሬኤሌ ቡሊ ኬኤዜሂ

15 ታኣኒ፣ ዳኣኔኤሌ ዬያ ዛጌ ባኮ ዛሎ ማላ ጎይሂ ዓኣንቲ ታ ዔሪባኣያ ፔቲ ዓሲ ማላ ባኣዚ ሙኪ ታ ቤርታ ዔቄኔ። 16 ዒማና ዑላዬ ዎሮኮ ሱካፓ፡- «ጌብሬኤሌ! ዬያ ዓሂም ያኦሲ ፔጋሲ ዳዌ ባኮ ዛሎ ቡሊ ኬኤዜ!» ጋዓ ዑኡሲ ታ ዎይዜኔ። 17 ዬያሮ ጌብሬኤሌ ሙኪ ታ ኮይላ ዔቃዛ ታኣኒ ዲቃቲ ሰዓ ሎኦሜኔ። ዬካፓ ዒዚ ታ ኮይላ፡- «ዓሲ ናይ ማዔሂዮ! ኔ ዛጌ ባካ ዓጮኮ ጋፒንሂ ዛላ ማዔሂ ኮሺ ዔሬ» ጌዔኔ። 18 ዬያ ዒ ኬኤዛኣና ታኣኮ ዒና ዲጲ ባይቁም ባሊቶና ሰዓ ታ ሎኦሚናኣኮኬ፤ ዒዚ ጋዓንቲ ታኣኮ ዑያ ፒዒ ሰዓፓ ታኣኒ ታ ቶኮና ዔቃንዳጉዲ ማኣዲ ዔቁሰዎ፤ 19 «ዬይ ኔ ዛጌ ባካ ዔርዛሂ ዓጮኮ ጋፒንዎ ዛሎ ማዔሂሮ ያኦሲኮ ጎሪንቶ ኬሎና ዎይታንዳቲያ ታ ኔኤም ፒዚሲ ኬኤዛንዳኔ።

20 «ላምዎ ካኣሮና ዓኣ ዓደ ማራዓሂ ሜዶኔና ፓሪሴ ካኣቶና ማላታያኮ፤ 21 ኮላዓሂ ጊንሃ ጊሪኬ ዓጮ ካኣቲ ማላታያኮ፤ ዬያጉዲ ሃሃ ላምዎ ዓኣፖኮ ባኣካ ዴኤፖ ጉራና ኬሴ ኮላዓሂ ጊሪኬ ዓጮኮ ቤርታኣ ካኣታሂ ማላታያኮ። 22 ቤርታኣ ካኣራሂ ሜቃዛ ቤዛ ኬሰኬ ያይዶ ካኣሮንሂ ዬይ ካኣታሂ ካኣታዲ ዎይሃ ዓጫ ያይዶ ካኣቶ ማዒ ፓቂንታንዳሂ ማላታያኮ፤ ዬይ ፔቲ ፔቲ ካኣታ ቤርታኣ ካኣታሂጉዲ ዲዲ ማዒንዲዎኣሂያ ዔርዛያኮ።

23 «ዬንሂ ካኣቶንሂኮ ካኣቲዎ ዎዳ ጋፓኣና ሜሌ ፑርታ፤ ሃሃ ጌኔ ማዳ ካኣቲ ካኣታዳንዳኔ። 24 ዬይ ካኣታሂ ማርጌና ዎልቃዳያ ማዓንዳኔ፤ ዬያ ዒ ማዳንዳሂ ፔ ዎልቁናቲዎኣኮ፤ ዒዚ ዛጊም ጊኢጉዎ ጎይሂ ዓሶ ባይዚ ኩርሳንዳኔ፤ ዒ ማዳ ባካ ቢያ ዒዛም ጊኢጋንዳኔ፤ ዒዚ ዴኤፖ ዴኤፖ ሱኡጎንታ ያኦሲም ዲማዴ ዴርዎ ባይዛንዳኔ። 25 ዒዚ ዑሃ ዓኣዴ ፑርታ ካኣቲ ማዔሂሮ ጌሺሂና ያርጎጫንዳኔ፤ ቢያፓ ዑሃ ዒ ፔና ዴግ ዴጊዳንዳኔ፤ ዔራንዳጉዲ ቤርታዲ ኬኤዙዎዎ ማርጌ ዓሲ ዒዚ ዎዲ ኩርሳንዳኔ፤ ሃሃ ዒዚ ካኣቶ ቢያኮ ካኣታሂያ ያሊ ዛጋንዳኔ፤ ጋዓንቲ ጋፒንዎ ዒ ባይቃንዳኔ፤ ዒዛ ባይዛንዳሂ ዓሲቲዎሴ። 26 ጉቶና ዒባኖና ዒንጎ

ባኮ ዛሎ ኔ ዛጌ ባካ ጎኔ ባኣዚኬ፤ ጋዓንቴ ዬይ ኔ ዛጌ ባካ ኩማንዳሢ ያደሲ ወዳይዳ ማዕሢር ዬያ ያኦማኣ ከኤተዋዎ ኔ ዒና ዓርቄ» ጌዔኔ።

27 ታኣኒ፣ ዳኣኔኤሌ ዒማና ሚርጌና ላቤሢር ዑፃ ታኣኮ ሃርጌም ሚርጌ ከሌ ታ ላሃኔ፤ ዬካፓ ታኣኒ ዔቁ ካኣቲ ታና ማዶም ዓይሤ ባኮ ማዳኔ፤ ዬያ ታ ዛጌ ባኮ ዛሎ ኮሺ ታ ማሊ ሜታዳኔ፤ ዬይ ዓይጎ ባኣዚታቴያ ዔራኒ ታ ዳንዳዒባኣሴ።

9

ዳኣኔኤሌ ፔ ዳር ዛሎ ሸኢቁ ሸኢጲያ

1 ሜዶኔ ዓጪ ሸይንቲ ዓርፄክሲሴ ጎዎሢኮ ናኣዚ ዳኣሪዮሴ ባብሎኔይዳ ካኣታዳኔ። 2 ዒዚ ካኣታዳንቴ ቤርታጎ ሌያና ታኣኒ፣ ዳኣኔኤሌ ጌኤዦ ማፃአፖ ዛጌ ዛጌ ጌይቤቃ ያኦሲ ፔ ማሊያ ከኤዛ ዔርሚያሴም ከኤዜ ጎይያና ዬሩሳላሜ ካታማ ደዒ ሻሃንቴያ ማዒ ዴዓንዳሢ ላንካይታሚ ሌዔታሢ ታ ዔራኔ። 3 ዬያር ታኣኒ ሲዬ ፓቲሌ ማይንቲ፣ ዲቢንሢዳ ዴይ፣ ሙኡዚ ሙውዋዎ ሸኢጲሢና ያኦሲ ባንሢ ታ ዛጌ። 4 ታኣኒ ያኦሲም ጎም ቡኡዲ ቡኡዲ ሂዚ ጌይ ሸኢቁኔ፡-

«ኔና ናሽካዞንሢና ዓይሢያ ኔኤኮ ካፓዞንሢናም ኔኤኒ ጫኣቃ ጫኣቁምና ናንጊና ናንጋ ናሹም ኔኤኮ ኔ ደዲሺ ካፓያ፣ ኔኤኒ ዴኤፒ፤ ሃሃ ዒጊጪሢሢና ኩይሳያ ናንጊና ናንጋ ጎዳ ማዕያ ኔኤኒ ያኦሲኬ።

5 «ኦኡኒ ጋዓንቴ ፑርታ፣ ዋይዚ ዒፃያ ማዒ ጎሜ ማዲ ኔኤም ዳቤኔ፤ ኔ ዋጎና ዓይሢያና ኩንሢያ ቦሃ ኦ ዒፃኔ። 6 ኦኡኮ ካኣቶም፣ ኦና ዋይሃ ዓሶም፣ ኦኡኮ ቤርታኣ ዓዶንሢንታ ኦ ዓጮይዳ ናንጋ ዴርም ቢያ ኔ ሱንያና ኔ ከኢቶ ከኤዜ፣ ኔ ዓይሎም ኦ ዋይዚባኣሴ። 7 ናንጊና ናንጋ ጎዳሢዮ! ኔ ጎኔ ባኣዚ ማዳያኬ፤ ጋዓንቴ ኔኤም ኦኡኒ ጉሙርቁንታያ ማዒባኣሢር ኦና ዓጮ ቢያይዳ ኔ ዜርቁም ዑኩ ሃሃ ሃኬ ዓጫ ዴንዲ ዴንዲ ዓኣ ዓይሁዶ ዴራ ዬሩሳላሜይዳ ናንጋዞንሢንታ ጉቤ ዒሰራዔኤሌ ዴራ ሃሢ ኦ ዴኤፒ ዳውሲንቲ ዳውሲንቲ። 8 ኦ ጎዳሢዮ! ኦኡኒ ቢያሢ ኔ ቤርታ ዳቢንቲሢር ኦናንታ ኦ ካኣቶንታ ኦና ዋይሃ ዓሶንታ ኦኡኮ ቤርታኣ ዓዶንሢንታ ኦ ዳውሲንቲ። 9 ናንጊና ናንጋ ጎዳ ማዕ ኦ ያኦዛሢዮ! ኦኡኒ ዋዚ ኔኤም ዓይሢንቶ ዒፄቴያ ኔኤኒ ሚጪንታያና ዓቶም ጋዓ ያኦሲኬ። 10 ናንጊና ናንጋ ጎዳ ማዕ ኦ ያኦዛሢዮ! ኔኤኮ ዋጎ ካፒ ዓይሢንታያ ኦ ማዒባኣሴ፤ ኔኤኮ ዓይሎ፣ ኔ ማሊያ ከኤዛ ዓሶ ዛሎና ኔ ኦም

ዲንጌ ዓይሢያ ት ካፒባኣሴ። 11 ዲሰራዔኤሌ ዓሳ ጉቤ ኔ ዎሳ ካፖ ዲዲ ሄርቄኔ፤ ኔ ጌዔ ባኮ ቢያ ዎይዞ ዲዳኔ፤ ኑኡኒ ኔኤም ዓይሢያቶ ዲዲ ዳቢንቴሢሮ ኔ ዓይላሢ ሙሴ ዛሎና ዲንጌንቴ ዎሳ ማፃአፖይዳ ፃኣፒንቴ ጋዳዎ ቢያ ኑ ጊዳ ኔ ዔኪ ዩዔ። 12 ኑኡና ኑ ሱኡጎናይዳ ዴኤፒ ሜቶ ኔ ዔኪ ዩዔኒ ከኤዜሢሢ ቢያ ኑ ጊዳ ኔ ማዲ ኩንሣኔ፤ ዩያሮ ዓጪዳ ቢያ ዓኣ ካታሞፓ ዩሩሳላሜጉዲ ሜታ ሄሌ ካታማ ፔቴታዎ ባኣሴ። 13 ሙሴ ዎሳይዳ ፃኣፒንቴ ጎይያ ዩያ ቢያ ሜቶ ኑ ጊዳ ኔ ዔኪ ዩዔ። ናንጊና ናንጋ ጎዳ ማዔ ኑ ያኦዛሢያ! ዩይ ቢያ ማዔቴያ ኑኡኒ ጎሞ ቡኡዲ ማዔ። ጎኑሞ ዓይሢሣ ጎይያ ዓኣዲ ኔ ማኣሪዎ ዴንቃኒ ኑ ሺኢቁባኣሴ። 14 ናንጊና ናንጋ ጎዳ ማዔ ኑ ያኦዛሢያ! ኔኤኒ ማዲ ባኮና ቢያ ጎኔ ባኣዚ ማዲያኬ፤ ኑኡኒ ጋባንቴ ኔኤም ዓይሢያንቴባኣሢሢ ሃያ ቢያ ሜቶ ኑ ጊዳ ኔ ዔኪ ዩዔ።።

15 «ናንጊና ናንጋ ጎዳ ማዔ ኑ ያኦዛሢያ! ኔኤኒ ሃያኮ ቤርታ ኔኤኮ ዴኤፖ ዎልቆና ኔኤኮ ዴሮ ጊብፃ ዓጫፓ ከሲ ሱንፃ ኔኤኮ ሃኖ ሄላንዳኣና ዔርቲ ዴዓንዳጉዲ ኔ ማሄኔ፤ ኑኡኒ ሃኣዛጌ ጎሜ ዓሲ፤ ሃሣ ዳቢንቴ ዓሲ ማዔ። 16 ናንጊና ናንጋ ጎዳ ማዔ! ኔኤኒ ማዴ ዲሎ ማዴ ዛሎሮ ቢያ ጌይጋፓ ኔኤም ዲማዴ ዲኤሎ። ዩሩሳላሜፓ ኔኤኮ ዳጎንታ ኔኤኒ ዳኬ ፑርቶ ባኮንታ ሺኢሻንዳጉዲ ኑ ኔና ሺኢቃኔ፤ ኑ ጎሞና ኑ ዓደንሢ ዳቢንቶ ዛሎናሮ ዩሩሳላሜ ካታሞንታ ዴሮንታ ኑኡኮ ዓሺኖ ማዓ ዓጫ ባኣካ ኑ ዳውሲንቴ። 17 ኑ ያኦዛሢያ! ታኣኮ ሺኢጲያንታ ታ ኔ ቤርቶ ዔኪ ሺኢሻ ባኮዎ ዎይዜ፤ ኔ ሱንፃሮ ጌይባካ ኔኤኮ ሻሂንቴ ጌኤዦ ማኣሮም ሚጪንቴ ማሌ። 18 ያኦሲያ! ሃዳራ ታኣም ዎይዜ፤ ኑኡኮ ሜቶንታ ኔ ሱንፃና ዔኤሊንታ ካታሜሎኮዎ ባይሲንቶ ሂንዳ ዛጌ፤ ኑ ኔና ሺኢቃሢ ኔኤኮ ማኣሪዎ ጉሙርቁኬ፤ ኑኡኒ ማዴ ኮሺ ማዴ ዓኣኔ ጌይ ዩያ ጉሙርቁቱዎሴ። 19 ናንጊና ናንጋ ጎዳ ማዔ! ኑም ዎይዜ፤ ያኦሲያ! ኑም ዓቶንጎ ጌዔ፤ ሃዳራ ኑም ዎይዜ፤ ኔ ማዴ ፔጋሲ ዳዌ፤ ያኦሲያ! ኔጊፖ፤ ሃኖ ካታሜሎንታ ኔኤኮ ዴሮንታ ኔ ሱንፃና ዔኤሊንታያኬ።»

ከኤዚንቴ ያኦሲ ማሊያ ፔጋሲ ጌብሬኤሌ ቡሊ ከኤዜሢ

20 ታናንታ ታ ዲጊኖ ዲሰራዔኤሌ ዓሳንታኮ ጎሞ ታኣኒ ቡኡዲ ቡኡዲ ያኦሲም ዲማዴ ዲኮ ዛሎዎ ናንጊና ናንጋ ጎዳ ማዔ ታ ያኦዛሢም ከኤዚ ከኤዚ ሺኢጲሢ ታ ዓርቄ። 21 ዩያ ታ ሺኢቃ ጎይሣ ዓኣንቴ ቤርታ ታኣም ፔጋዲ ጴዳ፣ ከኢታንቻሢ ጌብሬኤሌ ታ ባንሢ ዑኩና ባራኒ ሙኬኔ፤ ዩና ዎዳ ያኦሲም ዲንጎ ባኮ ዲንጎ ዎዳ ሄሌያ፣ ሳዓ ዲባኔያኬ። 22 ዲዚ ታ ኮይላ፡- «ዳኣኔኤሌ! ታኣኒ ሃይካ

9:21 9:21 ሉቃ. 1:19፤26።

ሙከራህ ይያ ያኦሲ ከኤዜ ያኦሲ ማሊያኮ ዓኣሺንቴ ባኮ ኔ ዔራንዳ ዔራቶና ጳቂሥሣና ኔኤም ዒንጋኒከ፤²³ ኔ ሃጊ ሺኢጲያ ዓዓርቃኣና ያኦሲ ኔኤኮ ሺኢጲያ ዋይዜ፤ ኔና ዒ ናሽካያ ማዔሣር ኔ ሺኢቄ ባኮ ታ ኔኤም ማሃ ከኤዛኒ ሙከ፤፤ ዬያር ዓካሪ ታ ኔኤም ከኤዛ ባኮ ኮሺ ዋይዚ ያኦሲ ከኤዜ ባኮኮ ቡሊያ ዔራ።

24 «ላንካይ ማይንቴ ላንካይ ቃልሾ ከሊ ጌይንቴህ፡- ያኦሲ ኔ ዴርንታ ያኦሲም ዴማዴ ካታሜሎንታ ጎማና ፑርታ ባኣዚናፓ ጌኤሻኒ ማሊ ቱከ ዋይዜ፤ ዬንሣ ዋይደዳ ዳቢንቴ ዓቶም ጌይንታንዳ፤ ናንጊና ፒዜ ባኣዚ ጌሰቴንቴ ዋጊንታ ዋጊሣ ሙካንዳ፤ ያኦሲ ፔጋሲ ዳቄ ባኣዚንታ ያኦሲ ማሊሣንታ ኩማንዳ፤ ዒኢቱ ጌኤኮ ማኣራኣ ጊንሣ ሻቴንቄ ዓካዳንዳ።²⁵ ዬያ ዒና ዔኪ ማሊ ጳቂሣ፤ ዬሩሳላሜ ጊንሣ ዓካዳንዳጉዲ ዓይሣንቴማፓ ዓርቃያ ያኦሲ ደኦሜ ካኣታሣ ሙካንዳያ ሃላንዳኣና ላንካይ ቃልሾ ከሊ ዓኣዳንዳ፤ ዬያጉዲ ሃሣ ላሃታሚ ላምያ ቃልሾ ከሊ ሜቶ ዋይ ማዒ ዓኣንቴ ዬያይዳ ደዲ ዬሩሳላሜ ካታሞኮ ሳዞ ጎይያንታ ዙሎይዳ ዋርዲያኣ ቦኣኪንቴ ኮሺንታንዳ፤ ዬይ ዋደ ቢያ ሜቶ ዋይ ማዓንዳ።²⁶ ላሃታሚ ላምያ ቃልሾ ከሊኮ ጊንፃፓ ያኦሲ ደኦሜ ካኣታሣ ፒዜ ጌኤሲ ጌሰቴ ዋጊንቴዋንቴ ዋዳንቴ ባይቃንዳ፤ ቤርታ ዓርና ማዒ ሙካ ያሎ ዓሶ ሱኡጋሣና ዒዛ ዓሶና ጌኤኮ ማኣርንታ ካታሜሎንታ ሻሂ ቤሲ ባይዛንዳ፤ ጋፒንፃ ባይሲንታ ዲጲጉዲ ዒማና ሙካንዳ፤ ባይዛንዳጉዲ ዓይሥሣ ዳኪንቴሣር ጋፒንሣ ሃላንዳኣና ያልዚ ሌሊ ማዓንዳ።²⁷ ዬይ ሱኡጋሣ ቃልሾ ከሊ ጋርካ ሚርጌ ዴሬና ዋላ ደዲ ሳሌ ሳላዳንዳ፤ ዬሮ ቃልሾ ከሎኮ ሃካሣዳ ያኦሲም ሹኪ ዒንጊንታ ባኮንታ ሃኣኮ ዒንጊያንታ ዒንጊሱዋ ዒ ዓይሳንዳ፤ ዬያ ባኮ ቤዘይዳ ባይሲንታ ዔኪ ሙካ ፑርታ ባኣዚ ማዳንታንዳጉዲ ዒ ማሃንዳ። ዬይ ያዲ ማዓንዳሣ ዬያ ባይዛያ ማዔ ሱኡጋሣዳ ዓጊንቴ ፑርቶ ባካ ማዳንታንዳያ ሃላንዳኣና» ጌዔ።

10

ዳኣኔኤሌ ፃግርሴ ዋር ዓጫ ያኦሲ ዳቄም ዛጌ ባኮ

1 ፓሪሴ ካኣቴ ቂርሴ ካኣታዳንቴ ሃይሣሳ ሌዖና ቢልፃሶኦ ጌይንታ ዳኣኔኤሌም ሜሌ ባኣዚ ፔጋዲ ጴዳ፤ ዬይ ከኤዚንቴ ባካ ጎኔ ባኣዚከ፤ ዬይያ ዳኤፒ ያልዚ ዛላከ፤ ጋዓንቴ ዬይ ከኤዛና

9:27 9:27 ዳኣኔ. 11:31፤ 12:11፤ ማቲ. 24:15፤ ማር. 13:14።

ባካ ሚርጌና ዴሌህ ማዕህር ቡሊፃ ገንህ ዲማና ፔጋዲ ዒዛሞ ጴዴጌ።

2 ዒማና ታኣኒ፥ ዳኣኔኤሌ ሃይሃ ቃልሾ ከሊ ጉቤ ያዩ ዴዔ።
3 ዳሽኪያ ማፃሞ ሜሌ ዓይጎሞ ኮሺ ሙኡዚ ታ ሙይባኣሴ፤ ዋይኖ ዑዦሞ ዑሽኪባኣሴ፤ ዬይ ሃይሃ ቃልሾ ከላ ዴንዲ ጋፓንዲያ ሄላንዳኣና ቶኦኮ ታኣኮ ታ ቲሺና ቲሽኪባኣሴ።

4 ሌዖ ዓይያይዳ ቤርታሳ ዓገኖኮ ላማታሚ ያይዳሳ ከሎና ታኣኒ ዴጌፖ ዋራህ ፃግሮሴ ዓጫ ዔቄ። 5 ዬካፓ ታኣኒ ዴግ ጌይ ዛጋንቴ ሻኣዣ ቦኦሬ ማኣፖ ማይንቴያ፥ ከርኖይዳ ዋርቄ ቃልሾ ቱኬ ፔቲ ዓሲ ታ ዴንቄ። 6 ዬያ ዓህኮ ዑፃ ዒንቁ ጌይንታ ሚዛፆ ሹጮጉዲ ፖፖዓያኬ፤ ዓኣፖ ካራኣ ዒዛኮ ዜዜኤሊንህ፤ ዓኣፓ ገንህ ታሚጉዲ ዔዔኤታያ ማላኔ፤ ዒዛኮ ቶኮና ኩጮና ዑጩ ገኢጊሾና ሞኦና ዓንገጉዲኬ፤ ዑኡዛ ሃህ ሚርጌ ዓሲ ዑኡሲጉዲ ያፖኦዣያኬ።

7 ዬያ ያኦሲ ፔጋሲ ዳዌ ባኮ ዛጌህ ታና፥ ዳኣኔኤሌ ሌሊኬ፤ ታኣና ዋላ ዓኣ ዓሳ ፔቲታፖ ዴንቄ ባኣዚ ባኣሴ፤ ጋዓንቴ ዔያታ ሚርጌና ዲቃቲህር ጳሽኪ ዴንዲ ፑኔ። 8 ታኣኒ ዒማና ዬያ ዲቃህ ሄርሺሳያ ማዒ ታኣሞ ጴዴ ባኮ ዛጊ ታኣር ሌሊ ዒኢካ ዓቴ፤ ዋልቃ ታኣኮ ቢያ ጋፔሞ ታ ላቤ፤ ዓኣፖ ካራኣ ታኣኮ ቦኦሬ። 9 ዬያ ዓህኮ ዑኡዛ ታ ዋይዛዛ ዒና ታኣኮ ዲቃቲያፓ ዔቄያና ዱጲ ባይቄሞ ሳዓ ታኣኒ ሎኦሜ፤ ዒኢካ ባሊቶና ሳዓ ሎኦሚ ላሂ ታ ዓቴ። 10 ዬካፓ ፔቲ ኩቺ ታኣኮ ዑፖ ካኣሚ ፒፃ፤ ታኣኒ ዒማና ጎጋይቄህ ዳ ዓኣህር ታና ዒዚ ከኤሊንቄሞ ኩጮና ሳፖ ዓርቄ ታ ቶኮና ታ ዔቄ።

11 ዬይ ያኦሲ ከኢታንታህ፡- «ዳኣኔኤሌ! ያኦሲ ኔና ዒናፓ ናሽካ፤ ሃኣዛጌ ታኣኒ ኔ ኮይላ ዳከንቲ ሙኬ፤ ኔ ዓኣ ቤዛ ፒዝ ጌይ ዔቄ፤ ታ ኔኤሞ ከኤዛ ባኮ ዒና ዔኪ ዋይዜ!» ታኣሞ ጌዔ። ዬያ ዒ ታኣሞ ከኤዛዛ ታኣኒ ጎጋይቄ ጎጋይቄ ሳዓፓ ዔቄ።

12 ዒዚ ዒማና፡- «ዳኣኔኤሌ! ዒጊጩፖ፤ ጳቄሥህ ዔራቶ ዴንቃኒ ኔ ቶኦኮ ኔ ያኦሲ ቤርታ ሂርኪዲ ላኣፒሳ፤ ማሌ፥ ቤርታሳ ከላፓ ዓርቃፖ ሽኢጲፖ ኔኤኮ ዋይዚንቴ፤ ታኣኒያ ዳከንቲ ኔ ኮይላ ሙኬህ ኔኤኮ ሽኢጲፖ ያኦሲ ማሂ ማሂያ ዔኪኬ። 13 ፓሪሴ ዓጮ ካኣቶ ሱኡጌ ማዔ ዓያናህ ላማታሚ ፔቲ ከሊ ጉቤ ታና ማኪ ሜቶ ቤኤዜ፤ ታኣኒ ፓሪሴይዳ ታኣር ሌሊ ማዔህ ዛጊ ያኦሲ ከኢታንታ ሱኡጎፓ ፔቲህ፤ ሚካዔኤሌ ታና ማኣዲኒ ሙኬ። 14 ታኣኒ ሃህ ሙኬህ ኔ ዒገኖይዳ ጋፒንፖ ዋዶና ሄላንዳ ባኮ ኔኤሞ ፒዚሲ

ከኤዛኒኬ፤ ዩያር ሃያ ሌሊቱዋንቴ ሃጊ ማዓንዳ ባኮ ፔጋሲ ዳዋኒ ጴዳንዳ ባኣዚ ሜሌ ዓኣኔ» ጌዔኔ።

15 ዩያ ዒ ታኣም ከኤዛዛ ታ ጎዖንዶ ጎይሢ ባይዚ ሳዖ ባንሢ ቁኡሉምቢ ዚቲ ጌዔኔ። 16 ዩካፓ ዓሲ ማላ ባካሢ ፔኤኮ ኩጮ ታ ባንሢ ሎይሲ ሙሱሮ ታኣኮ ካኣሜኔ፤ ታኣኒ ዒማና፡- «ጎዳሢዮ! ሃይ ዖኣሲ ታኣም ፔጋሲ ዳዌ ባካ ታና ኮሺ ሃርጌሢሮ ዑፃ ታኣኮ ደጪ ዓቴኔ። 17 ታኣኒ ኔኤም ማዳያ፡ ኔ ዓይሌ ማዓዖ ኔና ታ ጎዳሢና ዋላ ዋይቲ ጌሰታኒ ዳንዳዓይ? ዑኡዞታዖ ዔኪፃ ባሽም ሚርጌና ታ ላቤኔ» ጌዔኔ።

18 ዩይ ዓሲ ማላ ከኢታንቻሢ ላሚ ታኣኮ ዑዖ ካኣሚ ፒፃዛ ታኣኒ ደዴኔ። 19 ዒዚ ታኣም፡- «ዔኤዛይ! ዖኣሲ ኔና ዒናፓና ሸኻኔ፤ ኔኤም ኮሺ ማዓንዳኔ፤ ዒጊጪፖ፤ ደዴ!» ጌዔኔ። ዒዚ ዩያ ጋዓዛ ታኣኒ ደዳዖ፡- «ጎዳሢዮ! ኔ ታኣም ደዴም ዒንጌሢሮ ሂንዳ ዓካሪ ታኣም ከኤዛ» ጌዔኔ።

20-21 ዒዚ ሃሣ ጊንሣ፡- «ታ ኔ ኮይላ ዓይጋ ሙኩቲያ ኔኤኒ ዔራ? ታኣኒ ኔ ኮይላ ሙኩሢ ጎኔ ማፃአፖይዳ ፃኣፒንቴ ባኮ ፔጋሲ ኔኤም ከኤዛኒኬ፤ ሃጊ ጊንሣ ሃሣ ታኣኒ ሙኩ ፓሪሴ ካኣቶ ሱኡጌ ማዔ ዓያናሢና ዖልታንዳኔ፤ ታኣኒ ዴንዴሰካፓ ጊሪኬ ዓጮ ካኣቶኮ ሱኡጌ ማዔ ዓያናሢ ሙካንዳኔ፤ ጋዓንቴ ዒሰራዔኤሌ ካፓ ከኢታንቻሢ ሚካዔኤሌፓ ዓቴም ታና ማኣዳንዳይ ባኣሴ።

11

1 «ሜዶኔ ዓጮ ዓሢ ዳኣሪዮሴ ካኣታዳ ቤርታሳ ሌዖና ታኣኒ ዒዛ ማኣዳኒና ደዳሻኒ ዒዛ ኮይላ ዔቁኔ። 2 ታኣኒ ሃሢ ኔኤም ከኤዛ ባካ ጎኔ ባኣዚኬ።»

ጊብፃና ዓሶኦሬ ዓጮና ካኣቶ ዛላ

ዩይ ዓሲ ማላ ከኢታንቻሢ ሂዚ ጌይ ከኤዚሢሢ ዓርቁኔ፡- «ሜሌ ሃይሣ ካኣታ ፓሪሴ ዓጮይዳ ካኣታዳንዳኔ፤ ዩያቶፓ ሄሊሲ ካኣታዳንዳ ዖይዳሳ ካኣታሢ ሃንጎዋቶፓ ቢያ ባሽ ዖርጎቺ ማዓንዳኔ፤ ዒዚ ዖርጎቺ ማዓንዳያታሢሮ ዋልቃ ዒዛኮ ደዳዛ ሜሌ ካኣቶ ዞሪ ፔኤና ዋላ ዔኪ ጊሪኬ ዓጮ ካኣቲ ዒ ዖላንዳኔ።

3 «ዩካፓ ዖልዚ ዖላ ፔቲ ደዲ ካኣቲ ካኣታዳንዳኔ፤ ዩይ ካኣታዳ ዋይሣንዳ ዓጮ ሚርጌና ዳልጊ ማዓንዳኔ፤ ዒ ኮዔ ባኣዚ ቢያ ማዳንዳኔ። 4 ጋዓንቴ ዋልቃ ዒዛኮ ዑሣ ዓኣዳ ደዲ ደዲ ዓኣዳኣና ዒ ካኣታዳ ዋይሣ ዓጮ ፑርቲ ዓጮኮ ዖይደ ዛሎ ባንሢ ቢያ ፓቁንቴ ፓቁንቴ ዴዓንዳኔ፤ ዒዛ ቤዛ ዒዛ ዜርሢ ማዒባኣ

ካኣታ ካኣታዳንዳኔ፤ ያዲ ማዕቴያ ዬያ ካኣቶይዳፓ ፔቴ ካኣቲታፓ ዒዛፓዲ ዋልቃዳዓኩ።

5 «ጊብፄ ካኣቲ ዶዲ ማዕንዳኔ፤ ጋዓንቴ ዒዛኮ ሶሎ ዓሶ ሱኡጎፓ ፔቴ ዒዛፓ ባሽ ዶዳያ ማዕንዳኔ፤ ዒ ዋይህ ዓጫኣ ዳኤፔ ማዕንዳኔ። 6 ዳካ ሌዔኮ ጊንፃ ጊብፄ ዓጮ ካኣቲ ሶኦሪያ ዓጮ ካኣቲና ዋላ ሳሌ ጌሊ ዒጊንታንዳኔ፤ ዒዚ ፔኤኮ ዉዲሮ ናፖ ሶኦሪያ ዓጮ ካኣቲም ዒንጋንዳኔ፤ ጋዓንቴ ዒዛ ፔኤኮ ዋልቆ ዶዲሻኒ ዳንዳዒንዳዋአሂሮ ካኣቲኮ ዋልቃ ዶዶ ዒፃም ዔያታ ዋላ ጌሌ ሳላ ዶዲ ዴዒንዳዋሴ፤ ዬያሮ ዒዛ ዒዛ ዓሶንታ ፔኤኮ ናኣቶንታ ማዳ ዓሶንታ ዋላ ዋዲንታንዳኔ። 7 ዬካፓ ኔጉዋፖ ዒዛኮ ዒጊኒ ማዕ ፔቴ ዓሲ ዔቁ ካኣታዲ፣ ሶኦሪያ ካኣቲ ሶሎ ዓሶና ዋላ ያልታንዳኔ፤ ዔያቶኮ ዋርዲዮዋ ዶይሲ ጌሊ ዔያቶ ባሻንዳኔ። 8 ዔያቶ ያኦዘኮ ማላሂንታ ዋርቆና ቢሮ ዓንጎና ኮሾና ማሆንታ ዲዒ ዔኪ ጊብፄ ዓጮ ዒ ዓኣዳንዳኔ፤ ዳካ ሌዔይዳ ጊብፄ ካኣቲ ሶኦሪያ ካኣቲ ያላኒ ማሊ ዔቃዓኩ። 9 ዬካፓ ጊንህ ሶኦሪያ ካኣቲ ጊብፄ ዓጮ ካኣቲ ያላኒ ሙካንዳኔ፤ ጋዓንቴ ዒ ሙኩ ቶኮማና ፔ ዓጮ ጊንህ ማዒ ዓኣዳንዳኔ።

10 «ሶኦሪያ ካኣቲ ዓቲንቆ ናኣቶ ያልዚም ጊኣጊሽሂና ዲቢ ያልዚ ዓሲ ቡኩሳንዳኔ፤ ዬያታ ሶሎ ዓሳ ዋልቁና ሳፖ ጉኡዒ ዴንዳ ዲጲጉዲ ሙኪ ዋርዲዮ ሻሂ ጌሊ ያላንዳኔ። 11 ዬማና ዓካሪ ጊብፄ ካኣቲ ሚርጌና ዳጋዲ ሶኦሪያ ካኣቲ ያላኒ ዔቃንዳኔ፤ ሶኦሪያ ካኣቲ ያሎም ኬሴ ያሎ ዓሶዋ ዒ ባሻንዳኔ። 12 ዒዚ ሚርጌ ያልዚ ዓሲ ዲዒ ዔካንዳሂሮ ዒና ዒዛኮ ያቶርቃንዳኔ፤ ዬካፓ ሚርጌ ሺያና ፓይዲንታ ዓሲ ዒ ዋዲንዳኔ፤ ያዲ ማዕቴያ ዬያይዲ ዒ ባሽሂና ሌሊ ዴዓዓኩ።

13 «ዒማና ሶኦሪያ ካኣቲ ፔ ዓጮ ማዒ ዴንዲ ቤርታኣሰካፓ ባሽ ያልዚ ዓሲ ጊኣጊሻንዳኔ፤ ዳካ ሌዔ ዴዓፖ ዬያ ያሎ ዓሶ ኩሙሂ ዓንጋዋ ማይሲ ሶሎሮ ጊንህ ሙካንዳኔ። 14 ዬካፓ ሚርጌ ዓሲ ጊብፄ ካኣቲም ዋይዘ ዒፃንዳኔ፤ ዳኣኤሌ! ሃያ ኔ ዛጌ ባካ ቢያ ኩማንዳጉዲ ኔ ዒጊናፓኣ ፔቴ ፔቴ ዓሲ ጉሪ ዛሎ ማዛንዳኔ፤ ጋዓንቴ ዔያቶም ጊኣጋዓኩ። 15 ዬያሮ ሶኦሪያ ካኣቲ ዙላ ኬኤሌና ዲርቁንቴ ፔቴ ካታማሰኬኖ ማንጊ ዓርቃንዳኔ፤ ጊብፄ ዓጮኮ ያሎ ዓሳ ዬያቶ ቃዛዓኩ፤ ዔያቶ ባኣካፓ ያሎና ዔርቴ ዓሳታፓ ዋልቁ ባይቁ ባሽንታንዳኔ። 16 ኬዶ ዛላፓ ዓጮ ያሊ ዓርቃኒ ሙካሂ ኮዔ ባኣዚ ማማዳንዳኔ፤ ዬያ ዔቁቃዛንዳይ ባኣሴ፤ ዬይ ሙካሂ ያኦሲም ዲማዴ ጌኤኩ ዓጩሎታፖ ዓይሱዋፖ ጌሊ ዓርቃንዳኔ።

17 «ዲማና ሶኦሪያ ካኣቲ ፔኤኮ ጉቤ ያሎ ዓሶ ቡኩሲ ዔኪ ያሎሮ ማሊ ዔቃንዳኔ፤ ፔኤኮ ሞርኮ ማዔ ካኣቶ ዓጮ ያሊ ባይዛኒ ፔኤኮ ዉዲሮ ናዖ ዒንጊ ፔ ሞርኮ ካኣቶና ዋላ ፔቱሞ ጌኤሲ ጌሰቲ ጊኢጋንዳኔ፤ ያዲ ዒ ማዴቴያ ማሊፃ ዒዛም ኩማዓኪ። 18 ዬካፓ ዒ ባዘ ዓጫ ዓኣ ዓጮ ያሊ፣ ዬያ ዓጮፓ ማርጌ ዓጪ ባሺ ፔ ዴማ ማሂ ዓርቃንዳኔ፤ ጋዓንቴ ፔቴ ያልዚ ዓሲኮ ሱኡኔ ዒዛ ያሊ ባሻንዳሂሮ ዒዛኮ ያቶርሙማ ዒማካ ጋፓንዳኔ፤ ጎኔና ዒ ያቶርቁ ጮኦሽኪንቲ ጌሰቲ ጌኤዛ ቢያ ዒዛይዳ ማዒ ኩማንዳኔ። 19 ዒዚ ዬካፓ ፔ ዓጫ ዒ ዋርዲ ጊኢጊሽ ቤዘ ማዒ ዴንዳንዳኔ፤ ዬካ ጎይፃ ዒ ሜቶይዳ ኬዳንዳሂሮ ላሚ ዬያይዲ ኬሰኪ ጴዳዓኪ።

20 «ሜሌ ካኣቲ ዒዛ ቤዛ ካኣታዳንዳኔ፤ ዬይ ካኣታሂ ፔ ካኣቱሞኮ ቦንሻ ካፒ ዴይሂኒ ፔቴ ጊኢራ ጊኢሪሻንዳ ዓሲ ደኦራንዳኔ፤ ያዲ ማዔቴያ ዬይ ካኣታሂ ዳካ ዋዴኮ ጊንፃ ዋዲንታንዳኔ፤ ዒ ሃይቃንዳሂ ዴሬ ዒደ ዒዛይዳ ዓቁሞ፣ ጊንሃ ሃሃ ያልዚናኣቱሞሴ» ጌዔኔ።

ፑርቶ ሶኦሪያ ካኣቲ

21 ዬኖ ታኣም ያኦሲ ፔጋሲ ዳዌ ባኬላ ዋዚ ጌይሂታቴያ ቡሊ ኬኤዛ፣ ኪኢታንቻሂ ሂዚ ጌዔኔ፡- «ዒዛ ዬያ ካኣታሂኮ ቤዛ ፔቴ ቦሂንቴ ዓሲ ዔቁ ካኣታዳንዳኔ፤ ጋዓንቴ ካኣቲ ማዒ ቦንቲንቶ ቦንቻ ዒዛም ዒንጊንቲባኣሴ፤ ዒ ዬይ ዓሂ ጌኔ ጎይሂና ዔርቲባኣንቴ ካኣቱሞ ቢታንቶ ዔኪ ዴዓንዳኔ። 22 ዬይ ካኣታሂ ቁኤሶ ቢያኮ ዑፃ ማዒ ያኦሲም ማዳ ቁኤሳሂያ ዓይሱሞ ዒዛ ቤርታ ሺኢኬ ያሎ ዓሶ ቢያ ዋዲ ፒፂ ባይዛንዳኔ። 23 ማልቲ ዋላ ኮሹሞ ሳሌ ሳላዲ ሜሌ ዓሶ ዒ ጌሻንዳኔ፤ ዒዛ ዓሲ ማዒ ሃንታ ዓሳ ዳካ ማዔቴያ ደዲ ደዲ ዒ ዓኣዳንዳኔ። 24 ፔቴ ማርጌና ያርጎቺ ማዔ ፓቆና ዓጪ ዔርቲባኣንቴ ሙኪ ዒ ዓርቃንዳኔ፤ ዒዛኮ ቤርታኣ ዓድንሂፓ ፔቴይታዖ ማዲባኣ ባኣዚ ቢያ ዒ ማዳንዳኔ፤ ዒ ያሎና ዲዒ ዔኬ ባኮንታ ቆሎንታ ቢያ ዒዛ ዓሲ ማዒ ሃንታ ዓሶም ዒ ጊሽካንዳኔ፤ ዓሳ ዋርዲ ዋርዲ ዴዔ ቤዛይዳ ያልዚ ቡላኒ ዒ ማሊሂ ጌሃንዳኔ፤ ጋዓንቴ ዬይ ዒዛኮ ዳካ ዋዴሮ ማዓንዳኔ።

25 «ዬይ ካኣታሂ ዲቢ ያልዚ ዓሲ ቡኩሲ ዔኪ ጫርሹሞና ጊብፂ ዓጮ ካኣቲ ያላኒ ዴንዳንዳኔ፤ ጊብፂ ካኣቲያ ፔ ዛሎና ኮሺ ዲቢ ያልዚ ዓሲ ጊኢጊሽ ዬያ ሙኬ ያሎ ያሊ ቃዛንዳኔ፤ ጋዓንቴ ጊብፂ ካኣቲም ማዲንታንዳ ጌኔ ማዳ ዓኣሂሮ ዒዛም ጊኢጋዓኪ። 26 ዒዛና ዋላ ሙዓ፣ ደንዛ ዒዛ ዋዳንዳኔ፤ ዒዛኮ ያሎ ዓሳኣ ጋፓንዳኔ፤ ማርጌ ዓሲ ያልዚና ሃይቃንዳኔ። 27 ዬካፓ ዬንሂ

ለምድቅ ካኣታ ዲኖይዳ ጌጌ ማሊሂ ዳርቁ ዳርቁ ዓኣዖ ፔቴይዳ ዋላ ሙኡዚር ዴዓንዳኔ፤ ፔቴይ ባጋሂ ጌሻኒ ሉኡዚ ባኣዚ ዔያታ ዋላም ኬኤዛንዳኔ፤ ጋዓንቴ ጎዖና ዋዳ ሃጊ ሄለባኣሂር ዬያ ዔያታ ማሌ ጎይዖ ዔያቶም ማዓንዳ ባኣዚ ባኣሴ። 28 ዲማና ሶኦሪያ ካኣቲ ዲዒ ዔኬ ባኮ ቢያ ዔኬ ማዒ ዴንዳንዳኔ፤ ዲና ጋዓንቴ ዲዛኮ ያኦሲ ዓሳ ካኣሽካ ካኣኦ ባይዛኒኬ፤ ዲዚ ኮዔ ባኣዚ ቢያ ማዴሰካፓ ፔ ዓጮ ማዒ ዳኣዳንዳኔ።

29 «ዳካ ዋዴ ዴዓዖ ጊንሂ ዒ ጊብፄ ካኣቲ ዓጮ ያላኒ ሙከር ዳርቃንዳኔ፤ ያዲ ማዔቴያ ቤርታኣሲጉዲ ዲዛም ጊኢጋዓኬ። 30 ዲማና ሮሜ ዓጮ ዓሳ ዋኣሂ ካኣሚሌና ሙከር ዲዛ ያላንዳሂር ሚርጌና ዒ ዲቃታንዳኔ፤ ዲዚ ባሽንጉ ጊንሂም ደጫዖ ዴኤፒ ዲጋና ያኦሲ ዓሳ ካኣሽካ ካኣኦ ዲኢሳንዳኔ፤ ዬያ ካኣኦ ዲዒ ዲማዲ ዔቁ ዓሶና ዋላ ዲዚ ዲጊንቶ ማኡንዳኔ። 31 ዲዛኮ ያሎ ዓሳ ጌኤኦ ማኣርጎታ ኮይሎዋ ቢያ ዲኢሳንዳኔ፤ ቢያ ኬሊ ያኦሲም ዲንሳ ባካኣ ዲንጊንቱዋጉዲ ዒ ላኣጋንዳኔ፤ ሻኣካያ ማዔ ዲኢቲ ባኣዚ ዔኬ ሙኡሲ ዔቁሲ ባይሲንታ ዔኬ ዬዓንዳኔ። 32 ዬይ ካኣታሂ ያኦሲ ካኣሽኮ ካኣኦ ቤርታ ሃሼ ዓሶ ቢያ ጌሺ ዲዛ ባንሂ ማሃንዳኔ፤ ኮይሳ ጎይዖ ጉዴያና ያኦሲ ዔሬ ዓሳ ጋዓንቴ ደዳንዳኔ፤ ካኣቲ ዔያታ ደዲ ማካያ ማዓንዳኔ። 33 ዴር ባኣካ ዓኣ ዔር ዓሳ ዔያታ ዔሬ ባኮ ዴር ዓርዛንዳኔ፤ ጋዓንቴ ዔያታ ዳካ ዋዴ ታሚና ሚቸጎታንዳኔ፤ ጩንቻ ዓፓርና ጫታንዳኔ፤ ቆላኣ ዔያቶኮ ቡሪንጉ ዔውቴም ዔያታ ቱኡታንዳኔ። 34 ዬያጉዴ ዴኤያ ሜታ ዔያቶ ሄላኣና ፔቴ ፔቴ ዓሲ ዔያቶም ዳካ ባኣዚ ዲንጊ ማኣዳንዳኔ፤ ሚርጌ ዓሲ ጉሙርቁንጉሂናቱዋንጉ ጉሪ ማሊሲ ማዲሂና ዔያቶና ዋላ ፔቴ ማዓንዳኔ። 35 ዔር ዓሶፓ ፔቴ ፔቴ ዓሳ ዲቁንታንዳኔ፤ ያዲ ማዔቴያ ዔያታ ዬያና ደዲ ኬሰካዖ ደንኪሳ ባኣዚ ባኣ ዓሲ ማዓንዳኔ፤ ዬይ ያዲ ማዒ ዴዓንዳሂ ያኦሲ ጌዔ ጋፒንዖ ዋዳ ሄላንዳኣናኬ።

36 «ሶኦሪያ ካኣቲ ኮዔ ባኣዚ ቢያ ማዳንዳኔ፤ ዒ ፔና ያኦዞ ማሂ ካኣሽኮ ባካፓ ቢያ ዴግ ዴጊዳንዳኔ፤ ሜሌ ያኦዞ ቢያኮ ዑፃ ማዔ ያኦዞሂ ሃያኮ ቤርታ ዋይዚንጉ ቤቁባኣ ጫሺ ዒ ጫሽካንዳኔ፤ ማዲንታንዳጉዲ ጌይንጉ ባካ ቢያ ኩማኒ ኮይሳሂር ያኦሲኮ ጎሪንቶ ዋዳ ሄላንዳኣና ዔባ ዲዛም ጊኢጋያ ማዓንዳኔ። 37 ዬይ ካኣታሂ ዲዛኮ ቤርታኣ ዓድንሂ ያኦዞ ቦሂ ቶኣቻንዳኔ፤ ላኣላ ናሽካ ያኦዞዋ ዒ ቦሃንዳኔ፤ ዲዚ ፔና ቢያፓ ዑፃ ማሂ ፓይዳንዳሂር ካኣሽኮ ያኦዞ

11:31 11:31 ዳኣኤ. 9:27፤ 12:11፤ ማቲ. 24:15፤ ማር. 13:14። 11:36 11:36 2ቴሲ. 2:3-4፤ ዮሃ. ያፔ.ጳ 13:5-6።

ቢያ ዒ ቦሂ ሃሻንዳኔ። 38 ዬያቶይዳፓ ቢያ ዋርዲዮ ካፓኔ ጌይንታ ሜሌ ያኦዞ ባሼ ማሂ ዒ ቦንቻንዳኔ፤ ዒዛኮ ቤርታኣ ዓደንሂ ካኣሽኪ ቤቁባኣ ያኦዞም፡- ቢራ ዓንገ፣ ዋርቁ፣ ፓልም፣ ሚዛጲ ማዒ ቦንቻንታ ሹቹንታ ሜሌ ሚርጌ ሚኢሼም ሻንቹንታንዳ ባኣዚያ ዔኪ ሸኢሸ ቦንቻያ ማዒ ካኣሽካንዳኔ። 39 ዒዛኮ ዋርዲዮ ካፓንዳጉዲ ሜሌ ያኦዞ ካኣሽካ ዓሶ ዒ ፓይዲ ዓይሣንዳኔ፤ ዒዛ ጎኔ ሱኡጌኬ ጌይ ዔካዘንሂም ቢያ ዒዚ ዴኤፒ ቦንቻ ዒንገ ዴር ዋይሣንዳጉዲ ደኦሪ ጌሣንዳኔ፤ ዒዛም ዔይታ ማዴ ባኮ ዛሎርዋ ዴኔ ማሂ ማሂ ዓጪ ቲቁ ገሸካንዳኔ።

40 «ጌይንቲ ዋዳ ሄላዛ ገብፄ ካኣቲ ዴንዲ ሶኦሪያ ካኣቲ ያላንዳኔ፤ ያዲ ማዔቴያ ሶኦሪያ ካኣቲ፡- ሳርጌሎ ያይቶና፣ ፓራሂና፣ ሃሣ ዋኣያ ካኣሚሎናኣ ማኣዲንቲ ዶዲ ያሊ ዒዛ ቃዘንዳኔ፤ ገንሣ ሃሣ ሳዖ ጉኡዒ ዴንዳ ዲጲጉዲ ፒፂ ዓጮ ቢያ ፔ ዴማ ማሂ ዓርቃንዳኔ። 41 ሚዛጲሎ፣ ሃጋኣ ዋዛ ጌሂንቲ ዓጩሎዋ ዒ ባሺ ጌሊ ዓርቃንዳኔ፤ ዬያር ሚርጌ ዓጪ ዒዛ ኩጮ ጋር ጌላንዳኔ፤ ጋዓንቲ ዔይኦሚንታ ሞዓኣቤንታ ዓሞኣኔ ዓጮንታ ዬያ ያላፓ ቶሊ ዓታንዳኔ። 42 ሶኦሪያ ካኣቲ ዬያይዲ ሚርጌ ዓጮ ቢታንቶና ዋይሣኣና ገብፄ ዓጩኣ ዒዛ ኮይላፓ ቶሊ ዓቲንዳዋሴ። 43 ገብፄ ዓጩኮ ዋርቆንታ ቢር ዓንጎንታ ሜሌ ቦንቹንታያ ማዔ ባኮ ቢያ ዓኣቹንቲ ቤዛፓ ኬሲ ዒ ዔካንዳኔ፤ ሊኢቢያ ዓጩንታ ዒቶጲያንታ ቢያ ዒ ያሊ ባሻንዳኔ። 44 ዬካፓ ዓካሪ ዓባ ኬሰካ ዛሎና ኬዶ ዛሎናፓ ሙካንዳ ሃይሴ ዒዛ ዲቃሣንዳኔ፤ ዒዚ ዬያር ዴኤፒ ጳጋና ዔቁ ሚርጌ ዓሲ ዋዲ ቤሲ ባይዛንዳኔ። 45 ዴኤፖ ባዘና ጌኤዢ ማኣራ ማዢንቲ ሚዛጲ ጌሚርናኮ ባኣካ ዓኣ ቤዛይዳ ዴኤፒ ዴኤፒ ካኣቶር ማዓያ ዓፒላና ማዢ ማኣር ዒ ዴቃንዳኔ፤ ዬያ ቢያ ማዴዖ ጋፒንፃ ዒ ፔኤር ባይቃንዳኔ፤ ዒዛ ማኣዳንዳ ዓሲያ ባኣሴ።»

12

ጋፒንፆ ዋዶ

1 ዬያ ያኦሲ ታኣም ፔጋሲ ዳዌ ባኮ ቡሊ ከኤዛ ከኢታንቻሂ ላሚ ሃሣ ታኣም ሂዚ ጌዔኔ፡- «ኔ ዴር ካፓ፣ ዴኤፖ ከኢታንቻሂ፣ ሚካዔኤሌ ዬር ዋዶና ፔጋዲ ጴዳንዳኔ፤ ዓሲ ማዢንቲማፓ ዓርቃዖ ዛገቤቁባኣ ሜታ ሙካንዳኔ፤ ጋዓንቲ ሱንፃ ያኦሲ ማፃአፖይዳ ያኣፒንቲ ዓኣ ኔ ዴራ ሌሊ ዒማና ዳቃንዳኔ፤ 2 ሃይቁ ዲኡኪንቲም

12:1 12:1 ማቲ. 24:21፤ ማር. 13:19፤ ዮሃ. ያፔጳ 7:14፤ 12:7።

ዓጫ ሙዔ ዓሳ ቢያ ሃይባፓ ዔቃንዳኔ፤ ዩያቶይዳፓ ዛላ ናኣናና ናንጎ ናንጊዳ ጌላዛ። ዛላ ጊንሣ ናኣናና ቦርሲንቴና ደውሲንቴና ናንጎ ቤሲ ዴንዳንዳኔ። 3 ዬኖ ዎዶና ጨንጮ ዓሳ ጫሪንጫ ፖዓ ፖፖጉዲ ዓኣፓ ዲካያ ማዒ ፖዓንዳኔ፤ ሚርጌ ዓሳ ዔርዚ ፑርቶ ጎይፃፓ ኮዡ ባንሣ ማሄ ዓሳ ቢያ ጫሪንጫ ዓኣ ዡኣጎጉዲ ናኣናና ፖዒ ናንጋንዳኔ።»

4 ዬካፓ ሃሣ ዒ፡- «ዳኣኔኤሌ! ዓጮኮ ጋፒንፖ ዎዳ ሄላንዳኣና ሃያ ማፃአፖ ጉኡፒ፣ ዓሲ ቡሉዋጉዲ ካሮ ዲርቁ፤ ዬያ ያኣሲ ማለሣ ማዒ ኬኤዚንቴ ባኮ ኔ ዒና ዓኣቲ ዓርቁ፤ ዬኖ ዎዶና ዓሳ ፔቴ ቤዛፓ ሜሌ ቤሲ ጳሽኪ ሃንታንዳኔ፤ ዔኤቢ ዔራኒ ኮይሣንታ ዔራቶንታ ሚርጋንዳኔ» ጌዔ።።

5 ዬካፓ ታኣኒ ዎሮ ዓጮይዳ ላምፖ ዓሲ ሶ ሱኮና ሃኒ ሱኮናይዳ ዔቂ ዓኣያ ዴንቁ፤ 6 ዬያቶፓ ፔቴሣ ሻኣዡ ቦኦሬ ዓፒላ ማይንቴ ዎሮኮ ኬዶና ዔቂ ዓኣ ከኢታንቻሣ ኮይላ፡- «ሃይ ቢያ ሄርሺሲ ዲቃሣ ባካ ማዲንቴ ኩማንዳኣና ዎማዲ ዎዶ ዔካንዳይ?» ጌይ ያኦጮ።።

7 ቦኦሬ ሻኣዡ ዓፒሎ ማይንቴ ዎሮኮ ኬዶ ዛለና ዔቂ ዓኣ ከኢታንቻሣ ላምፖ ኩጮ ሌካ ጫሪንጫ ባንሣ ዔቂሳፖ ናንጊና ናንጋ ጎዳሣ ሱንፖና ጫኣቂሰካፓ፡- «ሃይሣ ሌዔና ዛላና ዔካንዳኔ፤ ያኣሲ ዴሮይዳ ሄላ ሜታ ጋፓዛ ዬይ ባካ ቢያ ማዲንቴ ኩማንዳኔ» ጌዔ።።

8 ዬይ ከኢታንቻሣ ኬኤዜ ባኮ ቢያ ታ ዎይዜ፤ ጋዓንቴ ዬይ ዒ ጌዔ ባካ ታኣም ዔርቲባኣሲ፤ ዬያሮ ታኣኒ፡- «ታ ጎዳሣኖ! ሃያ ቢያ ባኮኮ ጋፒንፖ ዓይጎ ማዓንዳይ?» ጌይ ያኦጮ።።

9 ዒዚ ታኣም ማሃዎ፡- «ዳኣኔኤሌ! ዓጮኮ ጋፒንፖ ዎዳ ሄላንዳኣና ዬያ ቃኣሎኮ ማሊፃ ዓኣቲንቴ ጌሣንቴም ዴዓንዳሣሮ ኔኤሮ ዓኣዴ፤ 10 ሚርጌ ዓሳ ሺርኪንቴ ጌኤሽኪ ኬሰኪ፡ ዔኤቢ ደንኪሳ ባኣዚ ባኣያ ማዓንዳኔ፤ ፑርቶ ዓሳ ጋዓንቴ ማሊ ጳቂሣ-ዎኣሣሮ ፑርቱዎይዳ ፑርቱዎ ቃሲ ቃሲ ናንጋንዳኔ፤ ጳቂሣ ዔራኒ ዳንዳዓንዳዞንሣ ጨንጮንሣ ሌሊኩ።።

11 «ቢያ ኬሊ ያኣሲም ዒንጎ ዒንጊፃ ዒንጊንቶ ዓቲም ሻኣካያ ማዔ ፑርቶ ዒኢሳ ባካ ቤዛ ዔቂ ኬላፓ ዓርቃፖ ፔቴ ሺያና ላምፖ ዪኤታና ታዞጲታሚ ኬሊ ዓኣዳንዳኔ። 12 ፔቴ ሺያና ሃይሣ ዪኤታና

12:2 12:2 ዒሲ. 26:19፤ ማቲ. 25:46፤ ዮሃ. 5:29። 12:4 12:4 ዮሃ. ያፕዳ 22:10። 12:7 12:7 ዮሃ. ያፕዳ 10:5፤ 12:14። 12:10 12:10 ዮሃ. ያፕዳ 22:11። 12:11 12:11 ዳኣኔ. 9:27፤ 11:31፤ ማቲ. 24:15፤ ማር. 13:14።

ሃይሢታሚ ደንጎ ኬላ ጋፓንዳያ ሄላንዳኣና ፔኤኮ ጉሙርቁያ ካፒ ሩንጌሢ ዓንጂንቴያኩ።

¹³ «ኔኤኒ ዳኣኔኤሌ! ጋፒንያ ሄላንዳኣና ኔ ጉሙርቁንታ ጉሙርቁንቲያማና ደዲ ሩንጌ፤ ዩካፓ ኔኤኒ ሃውሻንዳኔ፤ ሃይቢፓ ኔኤኒ ዔቁ ጋፒንያ ኬሎና ቦንቲ፤ ኔኤም ዒንጎ ባኮ ኔ ዔካንዳኔ» ጌዔኔ።

XXXV

ጌሌዢ ማግኒት

**The Holy Bible in the Maale language of Ethiopia,
using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማግኒት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929